

父
趣
神



天趣卷之二目錄

西園雜記

宋 米芾 元章

黔南道中行記

宋 黃庭堅 魯直

香山寺行記

溪上吟序

東郭南園記

遊洞庭山水月禪院記

宋 蘇舜欽 子美

金鄉張氏重修園亭記

宋 范補之 無咎

送陳同叟遊廬山序

宋 李綱 伯紀

石門洞記

宋 劉涇

文趣卷之二目錄

西園雅集記

宋米芾元章

黔南道中行記

宋黃庭堅魯直

香山寺行記

溪上吟序

東郭南園記

遊洞庭山水月禪院記

宋蘇舜欽子美

金鄉張氏重修園亭記

宋晁補之無咎

送陳洵幾叟遊廬山序

宋李綱伯紀

石門洞記

宋劉涇

括蒼舊州治記

宋喻良能

仙都觀記

宋葉夢得少蘊

鄱陽山水記

宋孫仲益

卧龍行記

宋王十朋龜齡
永嘉人

卧龍菴記

宋朱晦翁

西原菴記

武夷精舍雜詠詩序

武夷精舍記

宋韓元吉無咎

遊龍席山記

宋陸九淵子靜

雲門壽聖院記

宋陸游務觀

漱玉巖記

宋喻汝礪

鏡湖漁舍記

宋謝翱
身羽

遊石洞夜坐記

小鱸峰三瀑記

遊黃山記

宋吳龍翰

遊文山觀大水記

宋文天祥

遊寶界山居記

王問

鴈宕山記

元李孝光

遊上林記

元吳海

獅子菴記

元王胄

遊江陰三山記

元朱德潤

桃花洞修禊序

明宋濂

景濂浦江人

遊東湖記

明吳寬

厚博長洲人

小適亭銘

明崔銑

子鍾安陽人

龍池記遊

明唐順之

應德武進人

沱西別業記

明何景明

仲默信陽人

遊洞庭石湖記

明蔡羽

九達

吳中小記虎丘

明李流芳

石湖

虎仙橋

題西湖卧遊丹雲居寺

永興蘭若

題江南卧遊丹橫塘

遊焦山小記

水雲深處記

明具瓊

周氏池亭記

明楊循吉

君諱
吳縣人

開元寺至黃巖寺觀瀑記

明袁宏道

中郎

抱甕亭記

靈隱記

嵩遊記

華山別記

越中遊記禹穴

五泄二

遊息園記

明 顧璘

華王
吳縣人

遊衡嶽後記

遊鄆家山記

明 徐世傳

遊桃花記

明 陳繼儒

仲醇

梅花樓記

許秘書園記

鬼柴記

明 董其昌

遊武功山記

明劉陽

遊百泉記

明張縉彥

冷泉亭畫記

明程嘉樞
孟陽

重修冷泉疏亭

明沈守正

湖上書諸黃山人

明田汝成
叔本
錢塘人

顏公山記遊


明姚應仁

橫山草堂記

明江元祚
祁玉

浣花溪記

明鍾惺
伯敬



文趣卷之二

西園雅集團記

宋 朱芾 元章

李伯時效唐小李將軍為著色泉石雲物草木花竹
皆妙絕動人而人物秀發各肖其形自有林下風味
無一點塵埃氣不為凡筆也其烏帽黃道服援筆而
書者為東坡先生仙桃中紫裘而坐觀者為王晉卿
幅中青衣據方几凝行者為丹陽蔡天啓捉椅而視
者為李端叔後有女奴雲鬟翠飾侍立自然富貴風
韻乃晉卿之家婢也孤松盤鬱後有凌霄纏絡紅綠
相間下有大石案陳設古器瑤琴芭蕉圍繞坐于石

盤旁道帽紫衣右手倚石左手執卷而觀書者為蘇
子由圍巾蘭衣手秉蕉簞而熟視者為黃魯直幅巾
野褐據橫卷畫淵明歸去來者為李伯時披巾青服
撫肩而立者為晁無晷跪而捉石觀畫者為張文潛
道巾素衣按膝而撫視者為鄭靖老後有童子執靈
壽杖而立二人坐于盤根古檜下幅巾青衣袖手側
聽者為秦少游琴尾冠紫道服摘阮者為陳碧虛唐巾
深衣仰首而題石者為朱元章袖手而仰觀者為王
仲至前有鬚頭頑童捧石硯而立後有錦石橋竹迳
繚繞于清溪溪處翠陰茂密中有袈裟坐蒲團而說

無生論者為圓通大師傍有幅巾褐衣而諦聽者為
劉巨濟二人并坐于嵒石之上下有激湍滾流于大
溪之中水石潺湲風竹相吞爐香方襲草木自馨人
間清曠之樂不過于此嗟乎涵湧于名利之域而不
知退者豈易得此耶自東坡而下凡十有六人以文
章議論博學辯識英辭妙墨好古多聞雄豪絕俗之
資高深羽流之傑卓然高致名動四夷後之覽者不
獨圖畫之可觀亦足彷彿其人耳

黔南道中行記

宋黃庭堅魯直

紹聖二年三月辛亥次下字關同伯氏元明巫山尉

辛旻傍崖尋三游洞繞山行竹間二百許步得僧舍
彌大悲院才有小屋五六間僧甚貧不能為客煎茶
過大悲遵微行高下二里許至三游間一徑棧閣繞
山腹下視溪溪悚仄一徑穿山腹黥闇出洞乃明洞
中畧可容百人有石乳久乃一滴中有空處深二丈
餘可立常有道人宴居不耐久而去壬子堯夫舟先
發不相待日中乃至蝦蟆碚從舟中望之頽顙口吻
甚類蝦蟆也予從元明尋泉源入洞中石氣清寒流
泉激激泉中出石腰骨若虬龍糾結之狀洞中有崩
石平潤可容數人宴坐也水流循蝦蟆背垂鼻口間

乃入江耳泉味亦極不甘但冷熨人齒亦其源深來
遠故耶壬子之夕宿黃牛峽明日癸丑兩舟人以豚
酒享黃牛神舟人飲福皆醉長年三老請少駐乃得同元
明堯夫曳杖清樾間觀歐陽文忠公詩及蘓子瞻記
丁元珍夢中事視隻耳石馬道出神祠肯得石泉
甚壯急命僕夫運石去沙泉且清而歸陸羽茶經記
黃牛峽茶可飲因令舟人求之有媼賣新茶一籠與
草葉無異山中無好事者故耳癸丑夕宿鹿角灘下
亂石如圉廩無復寸土步亂石間見堯夫坐石援琴
兒大方倚側蕭然在事物之外元明呼酒酌堯夫隨

盤石爲几葉茶產石闌乃見此斗在天中堯夫爲履
霜烈女之曲已而風激濤波灘聲涵涵大方抱琴而
歸初余在峽州問士大夫夷陵茶皆云痛澁不可飲
試問小吏云惟僧茶味善試令求之得十瓶價甚平
也携至黃牛峽置風露清樾間身候湯手捫得味既
以享黃牛神且酌元明堯夫云不減江南茶味也乃
知夷陵士大夫但以顏取之耳可因人告傳子正也

香山寺行記

太守高仲本率南昌黃魯直墊江譚處道同來遠水
喬木僧房高下景物清絕爲夔路第一建中靖國元

年二月庚申微雨中來庭堅書

溪上吟序

春山鳥啼新雨天霽汀草怒長竹篠交陰黃子觀漁
於塘下尋春于小桃源從以溪童稚子畦丁三四輩
茶鼎酒瓢涵明詩編雖不命戎未嘗不取諸左右臨
瀟波拂白石詠涵明詩數篇清風為我吹衣好鳥為
我勸飲當其謬然無所拘繫而依依視矩準繩之間
自有佳處乃知白蓮社中人不達涵明詩意者多矣
過酒肆則飲亦無量也然未始甚醉蓋其所寓與畢
卓劉伶輩同而自謂所得與二子異人亦殊不能知

之也酒酣得紙書之爲溪上吟

東郭南園記

以道觀分於巖岩之上則獨居而樂以身觀國於蓬
革之間則獨思而憂士之處汙行以辭祿而朋友見
絕自聾盲以避世而妻子不知況其遠者乎東郭居
士嘗學於東西南北所與遊居半世公卿而東郭終
不偶駕而折軸不能無悶往而道塞不能無愠退而
伏於田里與野老并鋤灌園乘屋不以有涯之生而
逐無涯之欲久乃遽然獨覺釋然自笑問學之澤雖
不加於民而孝友移於子弟文章之報雖不華於身

而輝光發於草木於是白首肆志而無彈冠之心所
居類市隱也揔其地曰南園於竹中作堂曰青玉歲
寒木落而視其色風行雪墮而聽其聲其感人也深
矣據羣山之會作亭曰羣光逼而視之玉石磊砢徠
以松楠遠而望之攬空成色下與黼黻文章同觀其
曰羣微者草木金石之氣耶其曰山光者日月風露
之景耶不足以絃人之欲而山林之士甘心焉不知
其所以然而然也因高作閣曰冠霞艷明遠詩冠霞登彩
閣解玉飲椒庭者也蟬蛻於市朝之溷濁翳心亨之
業而乾沒之輩不能窺是矐儒之仙意也其宴居之

齊曰樂靜蓋取兵家陰符之書曰至樂有餘至靜則
廉陰符則吾未之學也然以予說之行險者躁而常
憂居易者靜而常樂則東郭之所養可知矣其徑行
之亭曰浩然委而去之其亡者莎鷄之羽逐而取之
其折者大鵬之翼通而萬物皆授職窮而萬物不能
櫻豈在彼哉由是觀之東郭似聞道者也東郭聞若
言也曰我安能及道抑君子所謂困於心衡於慮而
後作者也我為子家婚軒冕不及門子之姑氏懟我
不才者數矣殆其能同樂於丘園今十年矣可盡記
子之言我將刻之南園之石他日御而如阜雖不獲

雖尚其一笑哉予笑曰士之窮乃至於是夫於是乎
書東郭之鄉族名字曰新昌蔡曾子飛作記者豫章
黃庭堅

遊洞庭山水月禪院記

宋蘓舜欽子美

予乙酉歲夏四月來居吳門始維舟即登靈崖之顛
以望太湖俯視洞庭山嶄然特起雲霧縹翠浮動於
滄波之中予時據欄竦首精爽下墮欲乘清風跨落
景以翱翔乎其間莫可得也自爾平居朽然思欲一
到或於陰說而未果行則常若有物膈塞於胸中是
歲十月遂招徐陳二君子輕舟出橫金口觀其洪川

湯滴萬頃一色不知天地之大所能并容水程湘泗
七十里而達初宿社下踰日乃至入林屋洞陟毛公
壇宿包山精舍又泛明月灣南望一山上摩蒼烟舟
人指云此所謂縹緲峰也即登眺步自松間出數里
至峰下有佛廟踰水月者閣殿甚古像設嚴煥旁有
澄泉潔清甘涼極旱不枯不類他水梁大同四年始建
佛寺至隋大業六年遂廢不存唐光化中有浮屠志
勤者厯遊四方至此愛而不能去復於舊址結廬誦
經後因而屋之至數十百楹天祐四年刺史曹珪以
明月名其院勤老且死其徒嗣之迄今七世不絕大

中祥符初有詔又易今名予親震澤受三江吞吐
四郡之封其中山水各見圖誌者七十有二唯洞庭
稱雄其間地占三鄉戶率三千環四十里民俗真朴
歷歲未嘗有訴訟至于縣吏之庭下皆樹棠槐甘柚
為常產每秋高霜餘丹色未實與長松茂樹相差間
於崖壑間望之若圖繪金翠之可愛縹緲峰又居山
之西北深遠處高聳出於衆山為洞庭勝絕之境居
山之民已少事尚有歲時織紉樹藝捕採之勞浮屠
氏本以清曠遠事物已出中國禮法之外復居湖山
深遠勝絕之地壤斷水接人跡罕至數僧宴坐寂默

於泉石之間引而與語殊無纖芥世俗間氣韵其視
舒舒而行于于豈世上之遺民者耶予生平病悶鬱
塞至此爆然破散無復餘矣及復身世惘然莫知但
如蛻解俗骨傳之羽翰飛出乎八荒之外吁其快哉
慶曆七年十一月五日記

金鄉張氏重修園亭記

濟為州治鉅野下土草木不殖其西也無山東南五
十里乃有山而金鄉其東南邑故緡城地云嘗鑿山
得金因為金山縣凡平土淺山無金此山乃有金知
其地氣與并澤異凡九穀果蔬土有宜有不宜此咸

宜若松檜梅櫟遷乎其地而不能為良者植此皆良
又不可知也以余為兒時所聞見其俗饒美大家率
輕作業樂善而好士厚子弟於學遊客晨夜相面背
于門庖無熄烟然不倦又好為園圃遊樂事以相尚
而非為利張氏其甲也其先世豐人太宗時侍御史
肅字穆之以敢言不苟合四十謝事為王黃州所畏
始起家而顯者也御史子政字無逸高介有父風亦
早棄事初墾田作此園桂木異卉錯置竹萬竿出郭
門而望蔚然秀色橫野其陽金梭嶺陰賀溝起伏異
狀其外蒼蒼無際目極可喜無逸得此因忘仕宦意

而故張公安道石公曼卿皆與往來良厚園有亭曰
先春張公客遊愛之石公為宰每醉而忘返也皆有
詩留亭上兩公前輩偉人傑士不妄以詩與人也蓋
六七十年矣前此無逸子孝悼孝基孝孫亦善士好
客能繼其先人之業猶及與余先大夫遊聞先大夫
稱焉不知園幾時廢而元符中余南歸始自鉅野遷
此邑并嶺行溝上秋稼雜雜驚起馬前館無遺址桃
李不復在獨兩老檜蘿立穀隴間風雨摧剥蒼皮白
枝龍席躡蹻而上數十尺道衍漚而來未見也下馬
丰嶺北望南武七日諸山或斷或續屏列遠陸如畫

其南數百鳬鴈飛集鳴唼聲聞望白水明滅素野間意
甚樂之愼塗而詠吾居不可以易此也因買田築室
距百步時時至其地扪櫓坐石至於日入愴然惜兩
公之跡將泯而恨無逸之不復見也而其孫大方從
余遊久乃語之大方喟然有間曰此固張氏地請
爲未數歲則築垣移植如其故徑檻亭午草木扶疎
矣且營三亭曰先春其舊名也曰樂意曰生香因蔓
卿之詩也又礪三石來言曰其一求文以記其事其
二請書兩公詩與記俱傳也余欣然曰吾里俗衰不
有君子何以使復善且爲近市利日不足鋤犂腹飽

則載粟入城市買土宅士無邑居故吾里之為士者
微今子獨能羞而反之不致求贏餘既異里俗意而
夏世家之墜念祖父之所嘗遊晉公才士之跡至此
而俱熄也慨然面復之又欲因文以傳尤異余何愛
不為子記之亦稍稍化吾里持家猶子豈但數過子
相羊樂飲無人之境以忘吾老如是而已也

送陳洵幾叟遊廬山序

宋李綱 伯紀

江南諸山廬阜為最北枕九江南據星子奇峰秀嶺
綿亘連絡不可名狀彌為山林瑋偉絕特之觀士大
夫有高世之趣者多願遊焉政和癸巳之夏予自豫

章之京口道廬山下便風順流日數百里願遊而不
果往晝卧舟中仰望五老香爐諸峰嶺然倚天雲烟
出沒頃刻萬態意欣然樂之自謂地日累糧以償夙
願不難耳迄今八年薄宦霸東願莫之遂臨風撫心
每有遺恨今幾叟束裝不遠千里而往觴隆暑涉長
道不以為勞其志豈特欲盡山林偉瑋絕特之觀而
已哉茲山之南有人焉脩行如幻三摩鉢提歷諸世
故備常艱難如夢如響如光影如空翠其心安然不
為毀譽之所動搖其容渥然不為窮困之所枯槁其視
瞭然久而益明其氣桓然老而益壯幾叟將往見之

為我致問無量居士少病少惱否起居輕利否世事
可忍否云何脩菩薩道云何脩菩薩行願得居士警
歎筆墨之餘以作佛事使初發心者多所饒益幾叟
歸其有以語我來若夫山林瓌特之觀幅巾杖屨逍
遙徜徉騁懷寓目必有佳句從而寫之當裒集次第
併以示我使玩味諷繹如親遊其間以慰願到未遂
之心焉因為之序以識別宣和庚子仲春十有一日
昭武李某序

石門洞記

宋劉涇

宋景平中謝靈運守永嘉蠟屐得石門洞作詩遂為

東吳第一勝事梁天監中中書侍郎丘希範唐大曆
中侍御史丘丹州刺史裴士淹皆繼作唐末喪亂洞
廢不修宋皇祐元年蜀人李堯俞守郡初復古俄廢
垂五十年紹興三年蜀人劉涇守郡又新洞去人遠
溪山太陰松竹草昧瀑泉自雨不見秋色中有爽氣
仙鬼各以為家惡聞涕唾聲以人跡不至稱慶而植
漁松以生養有客舟過欲策杖往輒相問而速曰可
去虎豹出矣壽人杜穎佐郡行縣望洞天鬱羅泉流
號呼疾持斧伐蒙密處至泉四顧太息寫其狀歸以
示衆曰妙物乃如此仙都三巖人間世也飭僧銘寶

將其事既而告成茶烟大呖木魚嚦嚦於是知有宦
宰仙鬼失氣漁樵動色以一指心力而回精神於久
病既醉之餘余雖未目擊而夢寐夫遊真奇觀哉余
宦滿日可數其後廢興未可知使不幸廢又五十年
必有好事君子加於前一等與洞為林泉主人因作
記以祝仙鬼樵漁曰勿復期永廢可且同樂否

括蒼舊州治記

宋喻良能

浙東山水甲天下括蒼復甲浙東州宅奇秀又括蒼
之傑特偉觀由清香橋入賢星門上九盤嶺委蛇曲
折凡四百許步至譙門雙松大矯狀如龍蛇對峙門

之左右又行二百許步至儀門又北行百許步穿戟
門行數十步至設廳由設廳右行至便廳太守治事
之所也由便廳而入柱廊謂之凝香由凝香至燕喜
堂幽邃靜深灑灑可愛由燕喜至志喜堂遂至月臺
臺舊名拜香大生居其前石僧出其側山之翠微近
在杖屨下其東則凝霜閣楊公大年之所建也由凝
霜下行至好溪堂軒楹開豁棟宇宏麗層級三休至
烟雨樓憑欄四顧與天遠如登瓊溪樓如陟蓬萊閣
氣像絕似而爽塏過之萬山峨峨橫在一目或屹如
樓臺或聳如帆檣或如虎豹之蹲駢驅之驟或如驚

廢之出林巨魚之闖波下覩千井提封隆樓傑閣綠
牕朱牖掩映於青霏夕靄之近遠丹青水墨之所不
能盡令人目眩心懽徘徊而不忍去由虎溪折而右
至浙東道觀簾影無塵草色映階圓然蕭然不知其
公宇也其西則回溪少微二閣綿延青山在上流水
在下如烟雨畫屏愈看愈奇綠脩廊至夕霏軒見壁
間畫刻名賢法書如蘭亭序黃庭經樂毅論熟讀細
味似入太廟觀彝器令人肅然歛衽由夕霏至照水
堂所踐勝於前所喜愈於初仰睇霄溪憑虛欲仙又
見四松出於檐楹外如商山老人衣冠偉甚微風過

之如琴如筑如蛟龍吟如海潮聲真人世之絕境宇宙之奇觀也厯階而下百許步至擬滁亭規模雖小而意趣絕遠坐胡床對溪山下臨絕壑南明諸峰相距無一里琵琶捍撥橫陣洲渚漁舟買櫝出沒烟波中款乃之聲不絕于耳雖巧於摹寫如柳儀曹劉賓客輩猶不能得其彷彿况訥於辭而拙於筆如余者乎姑存梗槩以示後之人云紹興庚戌五月既望記

仙都觀記

宋葉夢得

少蘊

仙都觀在縉雲縣東四十里舊傳黃帝煉丹青上今為道觀唐李陽冰為今時書黃帝祠宇四大字尚存

山水奇秀見之若圖畫殆不可名狀也已酉冬避地將
之虔州道循雲輜舍於縣南之靈峰院東裝欲往遊
聞潰兵入境遽至其東十里有策道院謂之小仙都
一日可往迨兵既退乃乘間冒微雪過之時臘已窮
矣迺絕行山峻中兩旁壁立溪水貫其下多灘瀨遵
溪而行峻厲悍激與雪相亂山木攬天每聞谷中蹄
聲風輒自上下雪橫至擊面僕夫却立幾不得前既
至山愈險雪愈極溪流益急旁溪有數石拔起數百
丈不相倚附其最大者二畧如人行俯而相先後俗
名新婦阿家石望之如玉筍擁鼻仰視神觀聳然欲

與之俱升寒甚不可久留乃還至家已入夜四山晃
蕩盡白不能辨道索酒飲無有燃松明半車僅得溫
今日熱甚聊為一談望梅尚可止渴聞此當灑然
也

鄱陽山水記

宋孫仲益

鄱陽山水名天下而龍傳谿最勝介於德興餘干二
邑之間衆山面內環擁林立層巒疊嶂烟雲相連蒼
藤翠木蒙落搖掇如坐九疊屏如行五十里錦步障
而大谿橫其前衆水入焉傍有湧泉至溢四出高有
懸雷滾湧而下奔雲濺雪雷輟電散跳波急汰千態

萬狀既停既平循山而行大者瀦為湖小者聚為潭
井如曳練如卧白虹沉沉無聲盡水之變而魏公彥
成築一第其上為門為堂周以兩廡閣以望與曠宜
有高明朗徹之觀室以處與興宜極窈窕幽深之趣
左脩梧右襲桂藏書之府舍官之館供佛奉道各有
攸處然後跨兩崖為閣道於重門內以便往來開雲
扃抗水謝直欄橫檻朱甍素脊高者出林杪下者附
山趾花竹映帶隱顯明滅望之若化城然每遇勝日
或命巾或杖策披風松下待月竹間觀濶石上行吟
坐嘯從意所如鳥獸蟲魚之遊遨舉熙熙然相忘於

物之外雖桃源之勝不過也於是彥成以書來告曰
吾觀王公貴人厭軒冕之樂一朝幡然思欲振纓上
之塵於清泉白石之間而不得去則畫寒林雪竹黃
蘆睡鴨於團扇曲屏以供耳目之玩而寄意焉今吾
卜一區獲此奇勝幸為我識之乃為之記

卧龍行記

宋王十朋
龜齡
永嘉人

永嘉王龜齡少城周行可海陵查元章載酒來遊時
凍雨初霽風日清美山谷明秀照人道傍禰花盛開
藍輿徐行應接不暇寺有茶蘼羅絡松上如積雪棠
蘭數百本秀發岩石間微風透香所至芬郁東榮牧

丹大叢兩前已開道人植蓋護特留以供客飲罷從
步泉上瀹茗賦詩而歸

卧龍菴記

宋朱晦翁

卧龍菴在廬山之陽五老峰下予自少讀龜山先生
楊公詩見其記卧龍劉君隱居辟穀木食澗飲蓋已
度百歲而神清眼碧客至輒先知之則固已知有是
菴矣去歲蒙恩來此又得陳舜俞令舉廬山記者讀
之其言曰凡廬山之所以著於天下蓋有開先之瀑
布見於徐凝李白之詩康王之水簾見於陸羽之茶
經至於幽深險絕皆有水石之美也此菴之西蒼崖

四立怒瀑中湧大壑淵深凜然可畏有黃石數丈隱
映連屬在激浪中視者眩轉若欲蜿蜒飛舞故名卧
龍此山水之特勝處也於是又知其泉石之勝乃如
此間以行田始得至焉則菴既無有而劉君亦不可
復見獨其泉石之勝不得可改然其壯偉奇特之勢
則有非陳記所能彷彿者余既惜其出於荒堙廢壞
之餘而又韋其深阻愛絕非車塵馬跡之所能到僅
可得擅而有也時已上韋乞解郡綬乃捐俸錢十萬
屬西原隱者崔君嘉彥曰其舊址縛屋數椽以俟命
下而徙居焉既又緣名潭之義畫漢丞相諸葛公之

像置之堂中而故友張敬夫嘗為賦詩以記其事然
庵距潭猶數百步步亂石間三涉澗水乃至至又無
所托足以寓瞻眺或乃顛沛而反目相其東崖鑿石
為磴而攀緣以度稍下乃得巨石橫出澗中仰翳喬
木俯瞰清流前對飛瀑最為谷中勝處遂復作亭於
其上既以為吏民禱賽之地而凡來遊者亦得以徜徉
徙倚而縱目快心焉於是歲適大侵因謗之曰起
亭以為龍之淵卧者可以起而天行矣然余前日之
請迄今蓋已屢上而竟未有得也歲月飄忽念之慨然
乃叙其作興本末而書之屋壁來者讀之尚有以識

予之意也淳熙庚子冬十有一月丙辰新安朱熹以記

西原菴記

予少好佳山水異甚而自中年以來即以衰病不克逞其志于四方獨聞廬阜之奇秀甲天下而畸人逸士徃徃徜徉於其間意常欲一徃遊焉而未暇也前年蒙恩試郡適在此山之陽乃間以公家職事得至其中其岩壑幽深水石奇恠固平生所創見而於岩壑水石之間又得成紀崔君爲乃信前所聞者之不誣也君名嘉彥字子虛少慷慨有奇志壯歲避地巴

東三峽之間修神農老子術東下吳越以耕戰之策
干故相趙忠簡公是之會去相不果行君自是
絕跡此山按陳令舉所述圖記得西原庵故址于卧
龍瀑水之東築室居焉耕田種藥僅足以自給而四
方往來之士皆取食焉其疾病老孤無所與歸之人至
者亦收養之蓋年踰七十矣而神明筋力不少衰予
往造之而君不予避也一朝為予道說平生相與太
息會予結屋卧龍以祠諸葛丞相世蓋少識其意者
君獨歎曰此奇事也相為經記其事以迄有成兩年
之間相見者不知其幾而君未嘗一言及外事予

以是益嘉君之為人而重歎其既老無所復用於世也淳熙辛丑閏月之晦予既罷郡未宿卧龍君曰卧龍之沒夫子既書之矣顧西庵獨未有記復能為我書之乎予曰諾哉於是悉次其說俾刻焉新安朱熹記

武夷精舍雜詠詩序

武夷之溪東流凡九曲而第五曲為最深蓋其山自北而南者至此而盡聳全石為一峰拔地千尺上少平處微戴玉生林木極蒼翠可翫而四隕稍下則反削而入如方屋帽者舊經所謂大隱屏也屏下兩麓

坡坨旁引還復相抱抱中地平廣數畝抱外溪水隨
山勢從西北來四屈折始過其南乃復繞山東北流亦
四屈折而出溪流兩旁丹崖翠壁林立環擁神剎鬼
刻不可名狀舟行上下者方左右顧瞻錯愕之不暇
而忽得平崗長阜蒼藤茂木按衍迤靡膠葛蒙翳使
人心目曠然以舒窈然以深若不可極者即精舍之
所在也直屏下兩麓相抱之中西南向為屋三間者
仁智堂也堂左右兩室左曰隱求以待棲息右曰止
宿以延賓友左麓之外復前引而右抱中又自為一
塢因累石以門之而命曰石門之塢別為屋其中以

侯學耆之羣居而取學記相觀而善之義命之曰觀
善之齋石門之西少南又為屋以居道流取道書真
誥中語命之曰寒樓之館直觀善前山之巔為亭曰
望大隱屏最正且盡取杜子美詩語名以晚對其東
出山背臨溪水因故基為亭取胡公語名以鐵笛說
具本詩註中寒栖之外乃植援列樊以斷兩麓之口
掩以柴扉而以武夷精舍之扁揭焉經始於淳熙癸
卯之春其夏四月既望堂成而始來居之四方士友
來者亦甚衆莫不歎其佳勝而恨他屋之未具不可
以久留也釣磯茶竈皆在大隱屏西磯石上平在溪

此岸竈在溪中流巨石屹然可環坐八九人四面皆
深水當中科臼自然如竈可爨以瀹茗凡溪水九曲
左右皆石壁無側足之徑惟南山之南有蹊焉而精
舍乃在溪北以故凡出入乎此者非漁艇不濟惣之
為賦小詩十有二篇以記其實若夫晦明昏旦之異
候風烟草木之殊態以至於人物之相羊猿鳥之吟
嘯則有一日之間恍惚萬變而不可窮者同好之士
其尚有以發於予所欲言而不及者乎哉

武夷精舍記

宋韓元吉 無咎

武夷山在閩粵直北其山勢雄深盤礴自漢以來見

于祀事闕之諸山皆後出也其峯之最大者豐上而
歛下歸然若巨人之戴弁緣隙磴道可望而不可登
世傳避秦而仙者蛻骨在焉溪出其下絕壁高峻皆
數十丈岸側巨石林立磊落奇秀好事者一日不能
盡則卧小舟杭溪而上歸為九曲以左右顧視至其
地或平行景物環會必為之停舟曳杖倚徙而不忍
去山故多玉孫鳥則白鵲鷓鴣聞人聲或磔磔集涯
上散漫飛走而無驚懼之態水流有聲其深處可泳
草木四時敷華道士即溪之窮僅為一廬以待遊者
之食息往往酌酒未半已迫曛暮而不可留矣山距

驛路纔一二里許逆旅遙望不憚僕夫馬足之勞幸
而至老氏之宮宿焉明日始能裹飯命舟而溪之長
復倍於驛道之遠促促而來遽遽而歸前後踵相屬
也予舊家閩中兩宦于建安蓋亦還歸之一耳吾友
朱元晦居于五夫山在武夷一舍而近若其外圃暇
則遊焉與其門生弟子挾書而誦取古詩三百篇及
楚人之詞哦而歌之得酒嘯詠畱必數日蓋山中之
樂悉為元晦之私也予每愧為淳熙之十年元晦既
辭使節於江東遂賦祠官之祿則又曰吾今營其地
果盡有山川之樂矣蓋其遊蓋數而於其溪五折負

大石屏規之以為精舍取道士之廬猶丰也誅鉏草
茅僅得數畝面勢清幽竒木佳石拱揖映帶若陰相
而遺我者使弟子具畚鍤集瓦竹相率成之元晦躬
畫其處中以為堂旁以為齋高以為亭密以為室講
書肄業琴歌酒賦莫不在是予聞之恍然如寐而醒
醒而拍隱隱猶記其地之美也且曰其為我記之夫元晦
儒者也方以學行其鄉善其徒非若畸人隱士遁藏
山谷服氣茹芝以慕天道家者流也然秦漢以來道
之不明久矣吾夫子所謂志於道亦何事哉夫子聖
人也其步與趨莫不有則至於登泰山之顛而誦言

於舞雩之下未嘗不遊腦中蓋自有地而一時弟子
鼓瑟鏗然春服既成之詠乃獨爲聖人所予古之君
子息焉遊焉者豈以是拘拘乎元晦既有以識之試
以告夫來者相與斟酌於精舍之下俾或自得其視
慢亭之風抑又何如也是歲八月潁川韓元吉記

遊龍虎山記

宋陸九淵

子靜

木在龍氏金先填於亢著雍渚灘月望東壁時雨新
霽西風增涼閑雲未歸悠然垂陰黍粒登場稻花盈
疇菽粟粲然素麻沃然象山翁觀瀑半山登舟水南
宿上清信龍虎次于新興究仙岩之勝石瀨激雪澄

潭漬藍鷗翹鳬飛恍若圖畫疎松翠篠蒼苔茂草之
間石謾呈黃金之舒紅被岩綠坡爛若錦綉輕舟帆
檣嘯歌相聞聚如魚鱗列如鴈行至其尋幽探竒更
泊互進迭為後先有若偶然而相後先者蒼顏皓髯
語高領深少者整襟肅容視微聽冲莫不各適其適
余亦不知夫小大精粗剛柔緩急之不齊也乃俾猶
子謙之類之子持之分書同遊者七十有八人也姓
名字于左方

雲門壽聖院記

宋陸游
務觀
渭南人

雲門寺自晉唐以來名天下父老言晉盛時繚山茲

溪樓塲重複依岩跨壑金碧飛踊居之者忘老寓之
者忘歸遊觀者累日乃徧徃徃速不得出惟寺中人
或旬月不相覲也入寺稍西石壁峰為看經院又西
為藥師院又西繚而止為上方已而少衰於是看經
別為寺曰顯聖藥師別為寺曰雍熙最後上方亦別
曰壽聖而古雲門寺更曰淳化一山凡四寺壽聖最
小不得與三寺班然山尤勝絕遊山者自淳化歷顯
聖雍熙酌煉丹泉闕筆倉廵想葛稚川王子敬之遺
風行聽灘聲而坐蔭木影徘徊好泉亭上山水之樂
饜飲極矣而亭之旁始得支徑逶迤如綫脩竹老木

恠藤醜石交覆而角立破崖絕澗奔泉迅流喊呀而
噴薄方暑凜然以寒正晝仰視不見日景如此行百
餘步始至壽聖嶺絕孤絕老僧四五人引水種蔬見
客不知拱揖客無所主而去僧亦竟不知辭謝好奇
者或更以此喜之今年予來南而四五人者相與送
予至新谿且曰吾寺舊無記願得君之文磨刻崖石
予而其朴瑩而能知此也遂與為記然憶為兒時往
來山中今三十年屋蓋古竹樹益蒼老而物色益出
奇予亦有白髮久矣願未知予之文辭亦能少加老
否寺得額以治平某年某月後九十餘年紹興丁丑

歲十一月十七日吳郡陸某記

漱玉巖記

余飽聞閩中奇山川而賢士大夫最多亦復把酒自
慰一日登錦屏挈舟嘉陵江步至占星岩徘徊縱觀
倚老松卧恠石往往摩腹一笑然是三徑之遊須廢
吾一日糧惟母丘氏漱玉巖近在牆壁外乘興步履
從小奚奴直謁賢主人脫衣散髮坐巖復酌酒賦詩
相與作物外笑樂酒醉發狂即呼天大叫曰天乎真
不負喻汝礪矣吾嘗謂富貴之士不能放意于江山
松竹之樂而山川恠奇烟雲石竹詩酒風月唯遺逸

未遇之人始得兼而有之故天地間雄偉不凡之處
天所以資賢人而舒其憂愁之思者也吾零落荒山
鬱鬱無聊賴有錦屏嘉陵之雄偉占星漱玉之勝所
謂閬之四奇者吾皆得而有之他日解官視吾破囊
無復新井縣一物驅老鬚獨負四物以歸朋遊故舊
從吾覓閬中玉物吾則與飲酒取吾詩而歌之則是
四境者不移之而在几席間矣

鏡湖漁舍記

宋謝翱 阜羽

越城東南多隱者居唐迄今五百載賀監宅與玄真
子常往來處往往遺跡猶在高標清氣彷彿烟靄中

茲為可尚也王氏別業在城南蓋盡得其勝近又於
其旁蒔竹萬箇加以幽花貞石離立叅峙引水順亭
為九曲前置屋如列舟面鏡湖扁之曰漁舍嘗宴坐
今與客對禹山雲氣冉冉墮几席稍東二百步累石
為坡室方丈曰小瀛洲水環其外北望州治山蜿蜒
洄澦翔伏迤演蓋昔人以比蓬萊實與秦望天柱相
賓主而是州適中焉則茲名不為過負城田可數十
頃春夏之交水滿望洲小蓋浮艤榜其側舍嵐浴暉
頃刻殊狀不知天壤之有瀛海也余嘗一再造竹下
良久主人晉衣冠迎客子弟儼侍立語久蓋親俾余

為文識其位置次第故他不遑及或謂余公家世蓬
萊下方權貴人趣次第勢重灼殊甚草木動相德色
獨契契不肯歆艷附麗及茲益守前之為蓋有昔名
人隱者之所難可書也已足為記

遊石洞夜坐記

藥壺山其初總謂之仙巖余取其狀類藥壺且奇崛
特甚故別名之三石洞之遊直抵其頂拊摩苔蘚擷
靈草若芝朮而莫辨者歸於洞掬乳泉嚼嚙之山之
僧曰師遠者常遊方之外喜夜坐見予抵掌荒落蟬
蛸蟬蛸以為異邀宿寺中設燎露坐望藥壺諸岩連

洞如井河漢衆星挂其上小者欲飛大者如滴環侍
北斗無見者以問遠近云諸岩藥壺直西北最高北
斗墮其照故經年未嘗一見獨蘿陰缺處見南北厯
厯衆皆瞻仰歎異遂以是厯目覩日夜所得沾沾自
喜若恐失者與子善韶卿君實默識以一人糾之由
甲而乙各受其意以為句有次第語不逮意責在衆
意件而語自工以責糾者是夜將分有影射西巖初
如珠光走盤浸大如席須臾光遍樹石閃閃飛動視
東岩月復未吐益信仙宮紫府所見日月光影往往
與人間不同無足恠也復續聯句思益孤遠見為能

為相與不自知對坐兀兀達朝蓋先夜與子善宿韶
卿家因讀韓孟聯句舉此為例每得一聯書于紙有
未合衆爭句糾爭意始各執其是不相下執愈甚爭
愈力卒至於當而後已既成以為善故是夜復如之
先得韻四十四後三十八與題洞諸律絕句皆楷書
為卷復相與正其重複踈漏者竄若干若干是為記

小鑪峰三瀑記

陸士濟民之岩耕者發上石趾如刃游有隙如筋棄
而復食故凡樹石奇玩之鄰於耕者殆無完景間有
得全其天不毀以休息於此士皆民之所棄也其勝

處的自然見於圖經者又為塵衿俗駕旦至而睨之毀
畫贅疣以醜其外樸斲竅鑿以死其內與茲土為仇
又有甚於民之所懇者余至新亭之紫溪得爐峰紫
烟浮動旁無雜植宥肋之地以為之累而又見遺於
圖經不為人所知故得歸然以存水南出徑其趾雜
蒼藻不染他色友人翁君世居其下因約余賦詩間
有龍門瀑布者相去復不遠由溪之別澗行三五百
步水皆西流余謂水於天地間西行極少所產必稱
禽恠石與有道者居焉故三百里溯風而西即其大
者遂相與躡足蒼苔水石間有岩穹窿如門落深瀑

數千丈下爲潭浴石蒼碧賴白虹飲于井而蛟龍搏
之者既窮泉噉且卻毛髮起豎田穹窿扞蘿而上望
雙流繞麓石益深罕日且晚各賦詩危幘乘月而歸
約九日尋源至其頂如期携酒挿菊溯雙流益東古
藤青壁殆非人境泓溝溪二百餘步地稍峻泥如沙
欲流者數處仆且起亂石雲浮烟嵐薄林木片片欲
斷足相趾而進不敢視稍間斷前足已遠後者望前
者如乘雲空中遺影在地進至峽得一瀑自岩下爲
三級流乳成池四顧岩壁木根羣色欲滴衆客青簑
白帽浮杯乳上舉酒酬水遺殺接其中樵童牧豎觀

以無異復由亂雲上稍南一石嶺嵌飛動瀑蜿蜒如
舞白虹而下涎沫轉掉余無以名其狀復緣崖至頂
望乳池上復二級流乳藂薄中草木皆芝朮香蓋此
中所望而未見者明日復由回峽登前壁望上級垂
蘿裏濕蘚下與瀑屬歸而定其處為三瀑識其可為
亭者四曰放鶴在瀑頂曰穹石在下瀑落石亭曰可
憐在上乳池之下曰弄月居亂雲之上可為橋者二
跨中瀑曰玉峽居兩瀑合流曰雙硃為園遊同遺者
謀之不欲竅鑿樸斲贅疣為以累茲山始得蕙茸葍
以備藏修種梅數本瀑亭為泥丸散桃岩上下春秋

臨流濯髮夏乘風長嘯頂上冬看冰柱如是以老吾
年足矣橋與亭以某月經始先紀其事與同遊各賦
六詩書于石後二年亭成而刻之石

遊黃山記

宋吳龍翰

咸淳戊辰十月既望魯齋範雲龍古梅吳龍翰之菴
宋復一來觀黃山巔巔登高食胡麻飯掬泉飲之不
火者三日從者皆無人色率不能從予三人愈清狂
上丹崖萬仞之巔夜宿蓮花峰頂霜月洗空一碧萬
里古梅談玄魯齋誦史足菴歌遊仙招隱之章少焉
吹鐵笛賦新詩飄然有遺世獨立之興次躡煉丹峰

過仙人石橋酌丹泉徜徉久之次紆路遊水簾洞踏
月夜歸少憩蘭若把酒臨風對天都而酌之曰吾輩
與若為孰識他年志願俱畢無忘此山

遊文山觀大水記

宋文天祥

自文山門而入道萬松下至天籟盡一江橫其前行
數百步盡一嶺為松江亭亭接堤二千尺盡處為障
東橋橋外數十步為道體堂自堂之右循嶺而登為
銀灣臨江最高處也銀灣之上有亭曰白石青岩曰
六月雪有橋曰兩峰之間而止焉天籟盡居其西兩
峰之間居其東東西相望二三里此文山濱江一直

之大槩也戊辰歲余自禁廬罷歸日往來徜徉其間
蓋開山至是兩年餘矣五月十四日大水報者至時
館中有杜伯揚蕭敬夫輒呼馬戒車與二客疾馳觀
焉未至天畜盡其聲如疾風暴雨雷轟颶震蕩而不可
禦臨虎側目不得往視而隔江之秧畦菜隴悉為洪
流矣及松江亭亭之對為洲洲故垵然隆起及是僅
有洲頂而首尾俱失老松數十本及水者爭相毀曳
有偃蹇不伏之狀至障東橋坐而面上游水從六月
雪而下如建瓴千萬丈涵湧澎湃直送乎吾前異哉
至道體堂堂前石林立舊浮出水面如有力者一夜

負去酒數行使人候六月雪可進與吾圍棋以待之
復命曰水斷道遂止如銀灣山勢回曲水至此而旋
前是立亭以據委折之會乃不知一覽東西二三里
而水之情狀無一可逃道故自今而言則銀灣遂為
觀濶之絕奇矣坐亭上相與諧謔賦詩縱其體狀期盡其
氣力以庶幾其萬一予曰風雨移三峽雷霆劈兩山
伯揚曰雷霆真自地中出河漢莫從天上翻敬夫曰
八風捲地翻雷穴萬甲從天驟雪驥倚欄踰時詭異
卓絕之觀不可終極而漸告晚矣

遊寶界山居記

王問

王仲子之居在錫西南九里涇去涇里許為五里湖
湖上有漆塘冲獨大浮軍將諸山山背太湖即禹貢
震澤夫椒洞庭諸山在焉寶界山漆塘山別名也南
北塢多聚落竹木茂密山人以樵漁為業與之言城
府事不解草衣木食忻忻如也仲子治別業其間蓋
將老矣

鴈宕山記

元李孝光

客問山胡以鴈名也余為言長老相傳絕頂上有大
湖鴈過南海常棲止其中居人因以為名湖水墮入
澗流谷口為大龍湫湖旁有塔寺一夕沈湖中至今

五百餘歲然猶餘遺地敗址棠梨花數百十株皆儼
然成行列土絕膏肥種蹲鴟大如斗長老又言湖漸
淤為葑田十年前有僧來言吾近於鴈湖傍依大樹
縛屋種菜菰蹲鴟為餽糧願乞金錢作屋余問道路
何從入僧俱言從靈雲寺南入山時時過絕險挽牽
懸藤偃木以過日初出上山至午僅可到山顛望見
永嘉城下大江如牽一線白東面海氣蒼蒼如夜色
山上無膏燭燒木葉蒂竹為明山鼠來與人相向坐
如狐狸大予愛其言久欲登之嘗一至靈雲寺觀所
從入路因往至梅雨潭潭上瀑水懸空數十丈谷中

風起水吹着人常濛濛如四五月間霧雨亦一奇也
旁有鄰寺三四區曰古塔寶冠羅漢石門又有一寺
在南山冢與常雲相望路絕高曰飛泉種種自作面
勢皆可遊獨不大甬

遊上林記

元吳海

予舊至童山間西六七里許有上林之勝也數十里
許有鴈湖之奇欲遊之久而不果乙卯冬王侯用文
遂約翌日登鴈湖而主人有遽不得偕往已而王侯
猶力邀予至上林由林輿行二里許至郭家居川明
谷豁鷄犬數家時村民方蒔麥兒童押走野婦緝道

上牛羊牧其前藹然墟落之趣泓壑里許乃踰石磴
并麓曲折左為畬田右為林木稍進而曳疎竹數竿
老梅抱石立灌莽吐十餘花淡然若自娛者厯數折
負岩一二人家門常閉自是夾徑皆脩篁晴日節光
微風成韻又入深林蔭鬱里許表曰白馬峰蓋佛寺
在焉地勢迴環屋宇宏麗輝耀集目憇卧雲軒故翰
林林公潮守王侯諸名人詩具刻在壁余亦囑詩軒
中乃登寺山周流盤桓或藉草根或坐盤石長吟舒
嘯望高林斜照紫翠如染僧引泉自別壑醺之注佛
殿下為沼以植芙蕖沼中溢出右山之足轉徑前山

復入為池旁引泉入齋厨之下以激機舂然後通行
蔬圃間以資灌溉既又復歸于池以出而泉亦勞矣
是夕宿軒中寺僧再請登鴈湖黎明北風大作寒不
可禦鴈湖在望而不能即信乎游覽亦莫不有數焉

獅子菴記

元王胃

羅浮名山學道者萃焉寺觀僧道各庭宇精嚴景物
幽絕然猶涉人世之事其有人跡不到之地締草為
菴翛然物外又不可以人間勝景論也山中之菴何
啻百餘皆路入迺詰勢隱峯嶽護以水石環以花果
綢茅穴土鮮潔無塵殮谷茹芝清談有味一到其間

名利之心釋然矣余丙戌冬携家而往遊焉宿留浹
辰靈迹勝地無間夷險皆得適及一日訪黃龍洞登
七星壇有道人神定者延入其菴素壁茅簷柴扉竹
榻池雖不甃而可以鑑旁而睨之岩洞幽邃峰峦踔
嵒背負九峰路通雲頂面縣七松勢逼斗魁左右岩
石如翔如伏如揖如頤如樓閣棧道之勢花果隨分
禽鳥自得林影散而白日閑風籟寂而翠谷窅其勝
甲于諸菴俯視世俗迥然隔絕而不相聞顧問道人
是菴何名道人曰此獅子洞也前此亦多欲為菴而
苦于無水嘉定癸未普通竅其地得水于榻之側其

味甘冷視景泰之卓錫無異焉故前以洞名菴今改
泉源矣

遊江陰三山記

元朱德潤

余嘗遊名山未嘗不膏記其勝江陰去吳百八十里
不聞佳山秀水之名至正丁亥冬十一月既望因永嘉
通守余公德彙約為京口之行余公適舟行速僕舟
遲不能進也遂自無錫之北門數里大石橋入過水
村漁浦野田荒墅草木枯謝舟行六十餘里至青陽
鎮始見酒店村市客舟駢集又十里至他村崑高丈
餘河流灣曲若蛇蜿蜒之勢始抵江陰卅治晚謁翟仲

真州尹夜宿杜橋荒下明日西面登覽高丘則東瞰
長江南連吳會復自灣河過佗村而北皆美田沃壤
斥堠相望遙運青山迎棹樵歌牧唱相應若舟人
迴牽泓山前小河而行村墟相接荒柳交映兩山之
間浦溆縈帶北通江口地名石堰既而舟轉荒曲板
橋為梁即三山塢其間民居湊集屋瓦參差稻桔堆
委連衢比巷如壠如梯風俗熙熙翁呼兒藐婦餉姑
汲牛羊在山犬豕在園鳥噪于林鷄登于屋藹然太
平豐稔之象若古朱陳村焉其上皆不甚高峻而松
篁蒼翠石磴丹堊或頽然如屋或頽然如席窪然而

湫林然而僻少爲却出山塢有橫山在前野田開豁
水港漸寬詢其地則常之晉陵縣界於是舟人叩棹
椎子叩舷風帆二十里抵官塘漆市橋而泊焉嗟夫
一元之氣融結於亘古歸氣於山澤而有孕靈育秀
僻在荒陬不經名覽遊賢遂寂寥無聞江陰諸山是
矣余不識溫之鴈宕若吳之靈崖常之惠山迨不過
是惜不得與德業輩同爲深幽討勝之辭而品題之
且舟中傲兀覽之未詳姑書以識歲月

桃花洞修禊序

明宋濂

景濂
浦江人

浦江縣東行二十六里有峰聳然葱蒨者玄麓山也

山之西桃花澗水出焉至正丙申三月上巳鄭君彥
真將脩禊事于澗濱且窮泉石之勝前一夕宿諸賢
士大夫願明日既出相帥向北行以壺觴隨約二里
所始得澗流遂泓澗而入水蝕道柴盡肩不得比先
後累累如魚貫又三里所夾虎皆桃花山寒花開遲
及是始繁旁多髯松入天如青雲忽見鮮葩點濕翠
澗焰燄欲燃可玩又三十步詭石人立高可十尺餘
面平平可坐而簫曰鳳簫臺下有小泓泓上石壇廣
尋丈可釣聞大雪下時四圍皆瑤樹瑤林益清絕曰
釣雪磯而垂蓑靜瞰臺磯間女蘿與陵苔輒摘之

狀赤紛絲駿曰翠霞屏又六七步奇石怒出下臨小
窪泉冽甚宜飲鶴曰飲鶴川自川導水為蛇行勢前
出石壇下鏘鏘作環佩鳴客有善琴者不樂泉聲之
獨清鼓琴與之爭琴聲與泉聲相和絕可聽又五六
步水左右屈盤始南逝曰五折泉又四十步從山趾
斗折入涧底水匯為潭潭左列石為坐如半月其上
危岩橫峙飛泉中瀉遇石角激之泉怒躍起一二尺
細沫散潭中點點成暈真若飛雨之驟至仰見青天
鏡淨始悟為泉曰飛雨洞洞旁皆出峭石冠其顛遠
愛幽邃宜仙人居曰藥珠岩遙望見之病登陟之勞

無往者還至石壇上各敷茵席夾水而坐呼童拾斷
樵取壺中酒溫之實髹觴中觴有舟隨波沉浮鴈行
下稍前有中斷者有屬縣者方次第取飲時輕颺東
來觴盤旋不進甚至逆流而上若相獻酬狀酒三行
年最高者命列觴翰人皆賦詩二首即有不成罰酒
三巨觥衆欣然如約或閉目潛思或拄頰上視霄漢
或與連席者耳語不休或運筆如風雨且書且歌或按
紙伏崖石下欲寫復止或句有未當搔首蹙頰向人
或口吻作秋蟲吟或羣聚蘭坡集觴爭先或持卷授
隣坐者觀曲肱看雲而卧皆一一可畫已而詩盡成

杯行無美迨罷歸日已在青松下瀛按韓詩內傳三
月上巳桃花水下之時鄭之舊俗于溱洧兩水之上
招魂續魄執蘭草以祓除不祥今去之二千載雖時
異地球而桃花流水則今猶昔也其遠裔能合賢士
大夫以修禊事其或遺風尚未有泯者哉

遊東湖記

明吳寬

原簿
長洲人

東湖本陳湖也在長洲邑東南周可六七十里其涯
多良田居民資之予凡再遊焉而再樂皆以訪陳氏
故而有汝器玉汝昆仲為之主也當成化己丑歲予
與玉汝同試禮部歸及秋過其家午陰畢汝器亟命

舟泛湖入夜始還則月色如畫水波若空尊俎之間
歌聲相發有杜子美浹陂之樂後十年為戊戌之秋
予復過其家則玉汝初登進士第居京師汝器見客
至益喜顧患未疾使僮奴舁行庭中相從以為樂而
引滿劇飲如前日歡仍命舟泛湖則慙而不能從矣
予由姚城過蓆墟登磧沙入瑞雲觀吊古訪俗悉著
于詩有蘓子瞻西湖之樂及暮還而汝器笑迎于門
更具酒飲客且曰吾生長于是于是而農于是而漁
久矣中間雖一出長卿賦輒謝去今既老矣有子若
孫矣世俗事無預矣而吾益得與林僧野叟掉扁舟

舉杯酒出沒於渚雲沙月之間浩然而歌悠然而醉
其樂不可以語人者吾將終身焉湖在吾家之東因
以東湖自號其亦可記乎予曰唯唯既東京師數以
書抵其第促予記所謂東湖者蓋予在東湖之樂特
再遊耳使其屢遊之亦恐厭也然憶汝器疇昔之言如
是必有真可樂者予獨未足以窺其趣也異時與玉
汝南還汝器之疾當瘳相與益窮其樂酒酣興發尚
為執筆賦之

小適亭銘

明崔銑

子鍾
安陽人

古言真隱唯居城市終南何為乃捷徑止定哉泰宇

萬物之樞有湛者空任彼卷舒我屋臺東閱年三紀
祗事嚴慈煦成孫子我屋之對載闢一園作亭以茅
背負西垣亭小如拳園狹伊畦儒生環堵高士畏星
種花樹木春和秋清禽遺好音菊擅晚榮玄律聿臨
霏霏其雪松斯梅斯乃顯高節言念古賢仕止何心
道由坦坦迴車避嶽巖巖長公一仕而止軒冕奚華
覆我淳履董生著書三十不窺司馬獨樂非感佚遊
嗟予生晚瞻仰遺風望險停橈不濡於泮弦之誦之
游已息已綽綽在我炎炎在彼

龍池記遊

明唐順之

應益
武進人

嘉靖丁未春余以病客荆溪遂同杭子宣登龍池僧
居嵌岩中如鳥巢梯其門以登值二老僧相對煨笋
遂以笋供余二人因留宿與老僧坐至夜分談說楞
嚴因緣事老僧意甚朴野可愛也明日曉起嵐氣滿
山乾坤如混沌狀階前竹栢亦在摩蕩中咫尺不可
物色日且午始開霽則諸峰厯厯澄湖隱映樓觀草
樹百里之外若在几前蓋宇宙間晦明不常若此既
午出往石屑石屑兩山夾澗山高百餘仞而澗道僅
濶四五十步人家緣澗以居維亭午則見日色蓋其
勝又與龍池異觀矣既午飯遂從西霞步入舟意興

悠然如有得也嗚呼此豈可與沉酣聲利者道哉遂
書以貽子宣使藏之

沱西別業記

明何景明

仲默
信陽人

沱出於江余嘗浮江下峽所束勢漂疾淪漚澗澁
袂莫得傍展既入荆地平溢十數里其勢始得自縱
乃有別出若沱者焉沱至華容則蜿蜒回復帶城抱
郭起伏皆自重岡曲隴相應顯又澄澈可鏡予望慕
者久之乃知其地多秀產固有山川蔭之也吾郡守
孫公華容人間以是語之公曰沱之西吾別業在焉
始吾遊沱西見其地膏塲繡繡可以稼穡水有青赤

雜色之語可以冒網中又夷夷可搆而湖山四塞又
可以睡而得也遂購得之他日獲解官將唯是以於
而子者嘗得共槩為我記一言予業也奇公曰是子
所云華容秀產也既公之子世其者來從予從予益
奇之曰是又所謂秀產也而愈益信山川之能蔭也
孰知予向忻見山川者固公家物也公在壯歲官至
郡大夫而聲績懋著向往方殷未可以言退也然予
見今之仕者多以官為家而歸則無所於公乃預有
是計其明達邈有不可逮也別業至邑三里地名三
里店東墻以城睥睨互出林表西峙白鼎後為黃湖

前有湖曰田家湖湖之外為禹山列如屏障雜見丹
碧雲烟之所出入光景之所射映朝夕四時之所變
化不可記狀而公誠有成功引退之時日處其中治
田灌園持書訓子孫暇則置酒召客相與投壺彈棋
無不可樂者此固公所先畫於心而奚俟乎予言也
既記其勝復為沱水四章他日過沱西之堂幸歌以
自侑詞曰

沱之水清且漣兮宜爾子孫秀且賢兮沱之潄有田
廬廬我往于田其實碩甫沱之中其夷可官我日以
居裕其有終沱之^外其山若會予日以絃用緩我年

遊洞庭石湖記

明 蔡羽 九達

非高山不能驅吾神非深林不能洗吾思遊虎口之
乙日求石湖焉時少雨春盡漲未起舟梗於越來之
溪客刺木揭跣始獲登遵岸百步得茶磨之觀音崖
間行憇崖中為間從者至又百步得治平寺之竹林
西啓茶磨東繞拜郊臺其山皆墻立其腹多怪木美
箭望之蔚然深黑治平林之樾也從郊臺東走環突
奔縱為楞伽寺有浮圖挿雲中吳西南之鎮也竹林
逮楞伽不及五里峻甚多石客始連負以外浮圖之
前平展百餘步有亭其上曰望湖之亭於是石湖徑

其陽梅灣出其背左引靈崖右帶吳淞不出十五里
林密疏秀水風清潔生雲之山出泉之谷咸會亭下
客始定飲於亭而臨觀焉夫治平深林樛如高山入
其深搜玄鈞僻萬化俱賾登其高心空目開萬象俱
顯於一日之遊而兩極其情四月竹晚節松生花草
淮茂玉膏出林與泉俱香服之已暘而神生主人王
履約讀書石湖蓋三年矣用能抽其奇粵與客共暮
不謀歸而忘其倦則茲遊也王子之功

吳中小記虎丘

明
李流芳

虎丘中秋遊者尤盛士女傾城而往笙歌笑語填壑

沸林終夜不絕遂使丘壑化為酒場穢雜可恨予初
十日到郡連夜遊虎丘月色甚美遊人尚掃風亭月
榭間以紅粉笙歌一兩隊點綴亦復不惡然終不若
山空人靜獨往會心嘗秋夜與弱生坐釣月磯昏黑
無往來時聞風鐸及佛燈隱現林杪而已又今年春
中與無際舍侄偕訪仲和於此夜半月出無人相與
跌坐石臺不復飲酒亦不復談以靜意對之覺悠然
欲與清景俱往也生平過虎丘纔兩度見虎丘本色
耳友人徐聲遠詩云獨有歲寒好偏宜夜半遊真知

言哉

石湖

予往遊三到石湖遊皆絕勝已亥與方儒冒雨著屐
登山顛亭子貫酒對飲狂歌絕叫見者爭目攝之去
年與孟陽弱生公虞尋梅到此偁厯治平僧舍已登
郊臺至上方絕頂風日清美人意頗適九日復來登
高以雨不果登放舟湖中見烟橋兩楫沓雜而來舉
酒對之亦足樂也是日秋爽伯美舍弟輩俱有勝情
由薇村至上方復從郊臺茶磨取徑而下路傍時有
野花幽香童子采撷盈把落日泊舟湖心待月出方
命酒孟陽魯生繼之方舟露坐劇飲至夜半而還蓋

十年無此樂矣

虎山橋

是夜至虎山月初出携榼坐橋上少飲湖山寥廓風
露浩然真異境也居人亦有來遊者三五成隊或在
山椒或依水湄從月中相望錯落掩映歌呼笑語都
疑人外予數過此愛其閑曠知與月夕爲宜今始得
果此緣因憶閑孟子新無際產逸皆貪遊好奇此行
竟不得共閑孟以病挾子新彥逸俱東無際雖倦遊
意猶飛動以逐伴鞅鞅而去尤可念也清緣難得此
會當與諸君共惜之

題西湖卧遊丹雲居寺

武林城中招提之勝當以雲居為最繞山門前後皆
長松叅天蔽日相傳以為中峰手植歲久濘濘為寺
僧剪伐什不存一見之輒有老成凋謝之感殆不欲
多至其地去年五月偕方面泛小舟自小築至清波
訪張慙良寺中落日坐長廊沽酒小飲已徘徊城上
望鳳凰南屏諸山泓月踏歌而歸翌日遂為孟陽畫
此殊可思也壬子十二月鹿城舟中題

永興蘭若

壬子正月晦日同仲錫子與白雲棲翻白沙嶺至西

溪夾路脩篁行兩山間凡十里至永興寺永興山水
夷曠平疇遠村幽泉老樹點綴各各成致自永興至岳
廟又十里梅花綿亘村落彌望如雪一似余家西磧
山中是日餘永興登樓嘯詠夜還湖上小築同孟陽
印持子將輩痛飲翼日出丹子畫此癸丑十月烏鎮
舟中題

題江南卧遊丹橫塘

去胥門九里有村曰橫塘山夷水曠溪橋映帶村落
間頗不乏致予每過此覺城市漸遠湖山可親意思
豁然風日亦為清朗即同遊者未喻此樂也橫塘之

上為橫山往往曾與潘方孺阻風于此尋往至山下
有美松竹小桃方花恍若異境因相與攀躋至絕頂
風怒甚幾欲吹墮二十年事也丁巳中秋後三日畫
于孟陽閤門寓舍九月復同孟陽至武林夜雨泊舟
朱家角補題

遊焦山小記

二十七日雨初霽與伯美約為焦山之遊孟陽魯生
適自瓜州來會亟呼小艇共載到山訪湛公於松寥
山房不遇步至山後觀海門二石還登焦光嶺尋郭
山人故居小憇山椒亭子與孟陽指點舊遊孟陽因

誦湛公詩風篁一山滿潮水兩江多相與賞其標格
尋繇小逕至別山雲聲二菴徑路曲折竹樹交翳間
然非復人境有僧彌見無與之談亦楚楚不俗相與
啜茶而別尋瘞鶴銘於斷岩亂石間摩挲久之還飯
於湛公房孟陽魯生遂留宿山中予以舟將渡江勢
不可留怏怏而去孟陽魯生與山僧送余江邊徙倚
柳下舟行相望良久而滅落日注射江山變幻頃刻萬
狀與伯美扣舷叫絕不已因思焦山之勝間曠深秀
兼有諸美焦光嶺上一樹一石皆可彷徨追想其風
濤雲物盪育極目之觀又當別論且其地時有高人

道流如湛公之徒可與談禪賦詩逍遙物外觀其所
居結構精雅庖湍位置都不乏致竹色映人江光入
牖是何欲界有此淨居孟陽云吾嘗信宿茲山每於夕
陽登嶺眺望落景尚爛於西浦望舒已升于東淑琥
珎琉璫和合成界熠燿恍惚不可名狀嗟呼苟有奇
懷聞此語已那免飛動予自丁酉來遊未皇窮討人
事參商忽忽數年始一續至又以羈紲俗緣卒卒便
去如傳舍然不知此行定復何意良可浩歎自今以
往日月不居一娛難再賦歸之後縱心獨往尚於茲
山不能無情當擇春秋佳日買小艇襆被松寥閣上

十日夕以僦宿負滔滔江水實聞此言

水雲深處記

明 貝瓊

青林在華亭東南六十里地平衍無大山惟藪篠灌木蒼蔚蔽虧蓋亦海隅之斗絕幽邃所也其民田牧于中者雖早夜作苦足生胝脛無毛然皆樂其俗而安其業熙熙如太古時三吳之變兵亦不及予嘗徑竹崗絕黃浦邪迤而南由橫溪至青林盤回百折如帶舟礙石不可行抵暮候海潮而上四顧徘徊念可築室讀書以佚吾老規欲留而未能也一日曹君士璜遣介持面示予其號水雲深處者即璜之所居寔

據青林之勝卽世所謂秦人桃花源者又何以過之哉
天抵天壤之間百年之頃至樂莫如適意能適其意
者不在章綬而在于一邱一壑昧者方且奔走通都
大邑急自售以徼利祿爲事趨死地如歸者不亦悲
夫橫能果于忘世蚤棄內外務日掉孤舟興漁父
往來暮色蒼蒼星月上升則放乎中流舉酒相屬家
童取鐵笛作龍吟三弄以和巴歛之歌則其寄興豈
非高且遠耶余將去此而從之遊共相忘于水雲之
外矣

周氏池亭記

明 楊脩吉

君薰
吳縣人

有名園而無水是坐土猶未滌也有水而無臨觀之
亭亦棄水耳所謂園者林木一勝也水二勝也有是
二勝又必亭館點歸而後可游樹亦易植水亦易濬
亭館亦易構但使蒼鬱成林迴繞成流照映成境難
耳周君廷憲治園在吳中間曠清遠植雜樹百餘本
開沼爲回抱之勢周匝相通水亘館下乃作一亭跨
于綠流之上群窓洞開俯而觀焉可以鑒遊鱗閱卧
藻微浪之因風墮雲之在波皆可得而覽也余欲名
之莫得其似總名之曰池亭周公之園可謂足乎林
木饒乎水侈乎亭館者矣大凡胸次不高維頓實一

樹一石必不得其地若茲園之水木亭館皆以心匠出天巧合乎自然而有此全勝也好遊者可不至哉

開元寺至黃巖寺觀瀑記

明素宏道 中郎

廬山之面在南康數十里皆辟水從辟罅乎萬仞直落勢不得不森豎躍舞故飛瀑多而開先為絕勝登望瀑樓見飛瀑之丰不甚暢洄崖而折得青玉峽峽蒼碧立匯為潭巨石當其下橫偃側布瀑水掠潭行與石遇齧而闕不勝久乃歛狂斜趨侵其趾而去遊人坐石上潭色侵膚撲面皆冷翠良久月上枕潤聲而卧一客以文相質余曰試扣諸泉又問余曰試扣諸

潤客以為戲余嘗之曰夫文以畜八以氣出者也
今夫泉淵然黛泓然靜者其畜也及其觸石而行則
虹飛龍矯曳而為練漚而為輪絡而為紳激而為霆
故夫水之變至於幻恠竊忽無所不有者氣為之也
今吾與子厯金磻涉三峽濯澗聽泉得其浩瀚古雅
者則為六徑鬱激曼衍者則為騷賦幽竒恠偉變幻
詰曲者則為子史百家凡水之一貌一情吾直以文
遇之故悲笑歌鳴卒然與水俱發而不能自止客起
而謝次日晨起復至峽觀香爐紫烟心動僧曰至黃
岩之文殊塔瀑勢乃極扶而往磴狹且多折芒草割

人面少進石愈嶽白日蒸岵如行熱冶中微聞諸客
皆有嗟嘆聲既至半力皆慙遊者昏昏愁墮一客眩
思反余曰捐軀惜命何用遊山且而與其死於床第
孰若死於一丘冷石也客大笑勇百倍頃之躋其巔
入黃岩寺少定折而至前嶺席文殊塔觀瀑瀑注青
壁下雷奔海立孤零萬仞峽風逆之簾捲而上忽焉
橫曳東被西帶諸客請貌其似或曰此較人輸綃圖
也余曰得其色然死水也客曰青蓮詩此蘇公白水
佛跡孰勝余曰太白得其勢其貌膚子瞻得其怒其
貌骨然皆未及其趣也今與客從聞先來歌削十餘

里上鑠下蒸病勢已作一旦見瀑形開神徹日增而
明天增而朗濁膚之綻橫凡吾與子數年淘汰而不
肯淨者一旦皆逃匿去是豈文字所得詮也山僧曰
崖徑多虎宜早發乃下夜宿歸宗寺次日過白鹿洞
觀五老峰踰吳障山而返

抱甕亭記

伯愷寓近西長安門有小亭曰抱甕伯愷所自名也
亭外多花木正西有大柏六株五六月時涼蔭滿階
暑氣不得入每夕陽佳月透光如水風枝搖曳有若
浪紋衣裳床几之類皆動梨花二株甚繁盛開時香

雪滿一庭隙地皆種蔬果棚藤架菰路韭畦宛似村
庄小奴青泉負甕白石注水日夜澆灌不休面貌若
鐵稍暇則相與宴息樹下觀其意殊樂之無所苦凡
客之至斯亭者覩夫枝葉之翳鬱乳雀之哺子野蛾
之變化胥蝶之遺粉未嘗不以為真老圃也而是時
伯修方在講筵先鷄而入每下直之時眼中芒生稍
一假寐而中書催講章者已又在門頭睭枕上欲起
不得兒童以熱水拭面乃得醒者書如在霧中嘗自笑
以為不若青泉白石者之能有此圃也宏初入亭甚
適既見兄勞頓心竊苦而已愀然曰此余師焦先生

之舊居也當余初第時搢衣屏息偃僂門屏下與諸
弟子問業於此者不知其幾屐齒之迹猶在門限卷
硃未燥而先生已為遷客羊腸路險吾末如何蓋宏
反覆于此而知伯愷之寓意深詞旨遠也伯修殆將
歸矣

靈隱記

靈隱寺在止高峰下寺最奇勝門景尤好由飛來峰至
冷泉亭一帶涧水溜玉畫壁流青是山之極勝處亭
在山门外嘗讀樂天記有云亭在山下水中寺西南
隅高不倍尋廣不累丈撮奇搜勝物無遁形春之

日草薰木欣可以導和納粹夏之日風冷泉渟可以
蠲煩折醒山樹為蓋岩石為屏雲從棟生水與階平
坐而翫之可濯足於床下卧而狎之可垂釣于枕上
潺湲潔澈甘粹柔滑眼目之翫心舌之垢不待盥滌
見輒除去觀此記亭當在水中今依澗而立澗澗不
丈餘無可置亭者然則冷泉之景比舊蓋減十分之
七矣韜光在山之腰出靈隱後二三里路徑甚可愛
古木娑娑草香泉漬淙淙之聲四分五路達于山厨
菴內望錢塘江浪紋可數余始入靈隱疑宋之問詩
不似意古人取景或亦如近代詞客拈拾幫湊及登

韜光始知滄海浙江扞蘿剝木數語字字入畫古人
真不可及矣宿韜光之次日余與石簣子公同登山
高峰絕頂而下

嵩遊記

古云華山如立嵩山如卧二語勝畫非久歷烟雲者
不解這是語也然余謂華山如嵒冠道士振衣天末
嵩則眠龍而癯者也登嵩之路凡數處從萬歲峰者
為漢封故道汚田二十餘里至中峰巔下視諸峰危
石削壁或懸或仄態貌奇古因憶謝絳與梅聖俞書
所謂玉女面搗衣石八仙壇者按面索之去此當不

遠然石上無片字從遊百許人無一人解者可恨也
山巔一頽室側有古井甚晶濫早歲不竭前復有小
峰巖即古封禪壇規制亦敞余問道士此為峻極上
院耶道士茫然余笑曰若得劉伯壽為導當無此苦
元鼎問故余曰野史載劉伯壽築室嵩山下每登嵩
頂回則于峻極中院援筆記歲月登頂凡七十四次
伯壽蓋洛陽九老之一也有妾名萱草芳草皆秀麗
而善聲律伯壽出入乘牛吹鐵笛二草以蘄笛和之
穀滿山谷牛行即行牛止即止其心也必命壺觴盡
醉而歸嵩人以為地仙云元鼎躍然曰公作嵩記幸

述此一段以為太室佳話余諾之稍東為白鶴觀故
址背負三峰左右皆絕壁太熊諸山屏其前橫者如
案擁者如髻列者如眉幽邃平遠寔太室之奧宅也
一松亭亭立秀傑非常觀廢已久山中樹大于腕者
動遭剪伐而此松獨存殆有物護之松下遺跡宛然
募童子能得片碣者與百錢得古瓦礫者數錢一時
隸卒散盡披荆求之得古瓦數片皆琉璃龍其首唯
碣不可得欲過別峰而暝色已迫余謂元鼎曰松間
得一亭亭構小室遊者宿其上五日始為不負此山
也山之奧處不必論其指名者如韓公之龍潭歐公

之天门泉范公之三醉石皆不能以一日窮今之遊
者一宿少林輿而過太室之前至嵩廟天中閣倚欄
一觀歸而向人曰吾已盡嵩山矣是尚未觀其膚也東
行里許天昏黑不可得舊道從者曰從野橋坂下稍
近但險耳余笑曰嵩山無險乃杖策行崎嶇中約十
五里至山足是日曉出城未至門百步許見城外有
白烟突起以為爆烟頃之忽化為環大可數圍直入
雲際不滅者久之

華山別記

少時偕中第讀書長安之杜莊伯瞻出王安道華山

記相示三人起舞松影下念何日當作三峰客無何
家君同侍御饗公惟長從蒲坂回云登華至青柯坪
險不可止踰此則昌黎投書處余松諾中第近日于
鱗諸公皆迭其出彼獨非趾臂乎然心如望崖者十
九矣余既登天目與陶周望商略山水勝處周望曰
聞三峰最勝此生卽得至後余從家君遊嶽上有數
衲自華來道其險甚具指余體曰如公決不可登余
憤其言然不能奪今年以典試入秦見人輒問三峰
險處而登者絕少惟汪右轄以虛曹司理遠生楊長
安修齡曾一至其巔然面矜而口呿似未嘗以迭極

見許也余至華陰與朱武選非二約索犯死一往既
宿青柯坪導者引至千尺幢見細枝柴其上頂如覆
鐺天際一隙不覺心怖因思少年學騎馬有教余攀
鬣蹙蹙者心益劫後有善馳者謂余曰子意在馬先
常恨霜蹄之不刺則馳驟如意也余大悟試之良驗
今之教余按級勿下視者皆助余怯者也余手有繡
足有御何虞者三十年置而不去懷者慕其冷耳若
平莫如地土矣安所用之扣級而登惟恐險之不至或
坐或立與非二道山中舊事若都不經意者頃之越
絕崖踰溝度蒼龍嶺嶺盡至峯之地稍平行余意

勸百步一休從者相謂何前捷而後澁也余曰蹈危
者以氣喜一而怖十絕在險也怖一而喜十絕在奇
也吾忘吾足矣去危即夷以力相角此輿卒之長何
有於我哉下磴乃躋南峰之巔與非二席峰頭待月
是日也天無纖翳青崖紅樹夕陽佳月各畢其能以
娛遊客夜深就枕月光蕩隙如雪余彷徨不能寐呼
同遊樗道人復興至顛松影掃石余意忽動念吾伯
修下世已十年而惟長亦逝前日蘓潛夫書來道周
望亦物故山侶幾何人何見奪之速也樗道人識余
意乃朗誦金剛六如偈余亦倚松和之

越中遊記禹穴

禹穴一頑山耳禹廟亦荒涼不知當時有何奇而龍
門生欲探之然會稽諸山遠望寔佳尖秀溪冶亦自
可人昔王子猷語人但云山陰道上道上二字可謂
傳神余嘗評西湖如宋人畫山陰山水如元人畫花
鳥人物細入毫髮濃淡遠近色色臻妙此西湖之山
水也人或無目樹或無枝山或無毛水或無波隱隱
約約遠意若生此山陰之山水也二者孰為優劣具
眼者當自辯之夫山陰顯于六朝至唐以後漸減西
湖顯于唐至近代益盛然則山水亦有命運耶

五泄二

越人盛稱五泄然皆聞而知之陶周望雖極言五泄之好其實不曾親見與我等也發郡城凡二日至諸暨縣去五泄尚七十餘里次日始行一路多頑山無卷石可入目者余私念看山數百里外弊舟羸馬艱辛萬狀今諸山態貌若此何以償此路債周望亦謂乃弟余輩誇張五泄太過若爾當奈中郎笑話何獨靜虛以為不然頃之至青口兩山夾天如綫山石玲瓏峭削若疊若鏤數里一僻潭水涓涓流僻下一僻上有古木一株土人云是沈香樹一年一花樣樣

所不到其他非奇僻則皆濃花異草慢山而生紅白
青綠燦爛如錦映山紅有高七八尺者與他山絕異因
相顧大叫曰奇哉得此足償路債不怕袁郎輕薄
也王靜虛曰未也甫輩遇小小丘壑便爾張皇如是
明日見五泄當不狂死耶靜虛曾習定五泄三年以
是知之極詳余與公望聞之喜甚皆跳吼沙石上緩
步十餘里始至五泄僧房靜虛曰牛羊下矣五泄留
供來日朝餐因散步前山沿溪而行兩山一溪比青
口天尤狹而奇峭率相類山形或如爐如鍾鼓如屏
障劒戟皆拔地而生溪傍天竹成林行數里遇一白

鬚人云前山有虎同行者皆心動尋舊路而歸

五泄水石俱奇絕別後三日夢中猶作飛濤聲但恨
無青蓮之詩子瞻之文描寫其高古噴薄之勢為缺
典耳石壁青削似綠芙蓉高百餘仞周迴若城石色
如水浣淨挿地而生不容寸土飛瀑從岩顛挂下雷
奔海立穀間數里大若十圍之玉宇宙間一大奇觀
也因憶會稽賦有所謂五泄爭奇于鴈宕者果爾鴈
宕之奇當復如何哉暮歸各得一詩余詩先成石簣
次之靜虛公望子公又次之所目既奇詩亦變幻恍
惚牛鬼蛇神不知是何等語時夜已半魑呼虎獬之

聲如在床几間彼此諦視鬚眉毛髮種種皆豎俱若鬼矣

遊息園記

明 顧璘

華玉
吳縣人

東橋子築園居室之後袤五十步廣半損之中取纖徑通步餘盡蔣植以延叢得修竹後挺嘉木前列周除芳卉美草期四時可娛子常曰置山鬱柳負物性而損天趣故絕意不為中亭曰愛日本以封先驗封公曰天乎今無及矣虛窓淨几宜飲宜讀西有謀道齋三楹置諸孫讀書於中佔畢可悅耳作載酒亭以待夫問奇來憩者東有小軒曰促膝諸故人至解帶

密坐談農圃醫藥之事。迨至移日相向，為綠蔭室。居則掩視，納息存吾元。和起則觀童子理圖史之帙。時寄雅抱，命之曰息園。其南乃有廣圃，連數十頃。頌、雜池、治屋廬，其中達于清溪，非盡頌氏有。按志：當為謝尚江惣故宅。今廢為墟，而齊民業之。閭閻間所絕無也。檉榆蒲葦，掩映森鬱。風靜鳥鳴，音變巧慧。夏鶯好飛，移往來擇蔭，暫息候雨，逝去鷺散，立青蒼中，皎若積雪。時驚起翻迴水上，久乃復下。居人多將蔬養魚，雜治生業。或星散居，皆有徑可往。吾園開戶向之，籠取其勝，時與二三子曳履周遊，無異深林窮谷之趣。

此又鄉鄰所以息我者與夫息之義止也生也形貴
止神貴生動而不止形乃日敗靜而不撓神乃日生
一止一生壽乃長久然則息也者實形養神之道具
是矣造化遺我以年先人遺我以地隣里助我以勝
我顧糾纏外物而不知形神之為貴殆莊生所謂倒
置之民乎

遊衡嶽後記

夫登山者貴知其情不在勢也衡嶽之遊不至祝融
不足以知其高不至方廣不足以知其遠余初至嶽
下道士指天柱石廩紫蓋芙蓉四峰導余望之仰面

極視排漢礎日若云可望而不可登危乎高哉既歷
香爐道問則四峰之椒皆與身等方詫步履在空外
及至半山亭乃下視諸頂疑前舊見非是也至登祝
融之顛俯視四極蒼然一色山川雜陳瑣細莫辨風
自遠來其力甚勁候與地下絕殊比曉觀日出海體
象洞見近若疆中東餘遊氛浩漫無際限以扶桑其
外尚遠乃歎寰宇所周僅當天地之中耳再尋天柱
諸峰皆培塿丘垤墮乎其在地矣記曰祝融去地二
萬丈豈其然乎然靈岩恠石僧寮佛宇深者僅托間
阿林坳之間可一覩而窮未足言遙明日乃下西嶺

歷南臺出諸峰至平地迴望蒼鬱始若不可量復陟
其巔入山尋方廣之道峯回澗折徑盡復通高下連
嶂陰晴異壑有溪迢迢夾崖而出觸石澎湃數自遠
至中多菖蒲水草青被石上兩崖喬木挺生陰若洞
房日照不入積雪縞地間有山茶雜生含萼未吐自
午達昏上下坡陁幾二十里許其狀如一入寺復極
幽奧高山僻立類城郭狀有宋徽金書榜曰天下名
山懸正殿額假榻閑房夜靜泉溜益喧聒寺僧云自
此入西南山益深水益清衆不可窮矣大然後知衡
山之遙乃若此也

遊鄆家山記

明徐世溥

出秦人洞將往簫嶺曲道委蛇左右草花夾路不知
其名採之不忍目賞不旋遂乃坐石上攬玩久之陞
前路烟樹相與淺深若可披尋乃取道往行田徑循
迴溪愈曲愈幽從小徑入地方十畝畦有芋畦有禾
清池映沙魚不網罟四面高山環合山皆脩竹巖多
草花岩下有蠟蛸結網小竹間風吹花落皆係網上
不則飛墮池中魚往取食之不可得遂適然而返若
有所驚者茆屋十餘居人皆悶悶無所識從之沽贈
以棐栗山蔬因上山坐竹下飲之竹葉滿天仰不見

日俯見日影風來竹動日影搖碎方圓不定欣慨良久問其山不知名問其氏鄆姓云云

遊桃花記

明陳繼儒仲醇

南城獨當陽城下多栽桃花花得陽氣及水色大是穠華居民以細榆軟柳編籬圍牆花間菜畦館結相錯如綉余以花朝後二日呼陳山人父子爛酒提小榼同胡安甫宋賓之孟直夫渡河梁踏至城以東有桃花蓊然推戶闥入見一老翁具鷄黍餉客余輩衝筵前索酒請移酒花下老翁愕視恭謹如命余亦不通姓字便從花板酒盃老饕一番復攀桃枝坐花叢

中以藏鉤輸贏為上下五六人從紅雨中作活轆轤
又如孤猿狂鳥探葉窺果惟愁枝脆耳日暮乃散是
日也老翁以花朝為生辰余于酒後作歌贈之謂老
翁明日請坐危晡為壽十四日余與希周直夫叔意
挈酒榼甫出関路途得伯靈子猶拉同往又遇素長
史披鶴氅入城中長史得我輩看花消息遂相與及
至桃花溪至則田先生方握鉏理草根見余輩便更
冠出爾客客方散踞石上而安父賓之箕仲父子俱
挈酒榼佐之董徐何三君從城上窺見色為動復踉
蹌下城又以酒及鮮筍貽剛佐之是時不連而會凡

十八人田先生之子歸駢為十九楹十一酒七八壺
觴酒屈興信花醉客醒方苦錫罍相恥忽城頭以長鞭
鎚酒一尊送城下客則文卿直卿兄弟是也余輩大
喜賞為韵士時人各為隊隊各為戲長史伯靈角智
局上紛紛諸子飽毒空拳主人髮短耳長龍鍾言笑
時酒漉尚餘乃從花籬外要路客不問生熟妍醜以
一盃酒澆入口中以一枝桃花簪入髻角人人得歡
喜吉祥而去日暮鳥倦余亦言旋皆以月影中抱持
而顧視紗巾縹袖大都酒花花醉而已昔陶徵君以
避秦數語輸寫心事借桃源為寓言非有真桃源也

今桃花近在城邊無一人為花作津梁傳之好事者
自余問津後花下數日間便甬成溪第賞花護花者
舍吾黨後能復幾人衆人摧折如怒風甚兩至使一
尼赤霞闌珊狼籍則小人于桃花一公案可謂叨罪
半之矣

梅花樓記

王元美嘗謂余市居之迹干喧也山居之迹干寂也
惟園居在季孟間耳然王氏之弇山枕城中朝暾映
門遊履麇集即主人亦徃徃支門謝客欲放而之於
曠閑無人之鄉而不可得余然後知園之與衆也寧

獨與其謀于市也寧謀于野吾友范象先有園在橫
澗野塘之南去城十里而近喧寂半之四面榆柳陰
翳小池上梅花兩樹婆娑相對蒼枝老骨縱橫屈曲
排簷而上其榦可抱其葉可蔭一卧餘其子可得五
石范子謂吾見梅多矣未有如此君之老而奇者乃
結高樓以臨之獨與一二老衲攤虎皮藝倪鼎倚樓
而歌之曰雪滿山中高士卧月明林下美人來已復
笑曰如李廸詩不過得花之幽韵閑淡而已吾家老
梅改如碧眼胡僧偲眉露額又若毒龍怒虬紛拏嬉
闐于廣莫之野攫爪迸鱗鬼恠萬狀度他梅詎足與

此君爭勝庶幾鍾賈山之嘉樹四賢祠之紫藤差鼎
足耳范子樓既成於是廣蔣霞桃李芙蓉來禽之屬以
映帶之池加闢竹加徙梅之為觀日閑以敞而陳子
適來陳子曰吾嘗聞往年探梅者過壽安寺中寺僧
為遊客所困至拆而為薪而其次惟光福玄墓之傍
薄雪輕雲漠漠數里一快生平然村人率以種梅為
業不復有品題護持與梅花兩相韻者古今梅花之
知己僅得林逋君復迄三百年而有范子范子于此
中塊然野處白板赤欄朱簾碧幄依微獨立于暗香
疎影之外何異處士孤山所少者童子開籠放鶴耳

他日抱鶴上扁舟送之花下烟沙星渚短笛悠悠有
巍然破輕浪而出者則陳先生至也子其報梅花吐
一枝以俟我

許秘書園記

士大夫志在五岳非狎于婚嫁則窘于勝具勝情于
是葺園城市以代卧遊然通人排園酒人罵坐喧笑
收署莫可誰何門不得堅扃主人翁不得高枕卧欲
舍而避之寂寞之濱莫若鄉居為甚適吾友秘書許
玄祐所居為唐人陸龜蒙甫里其地多農舍漁村而
饒于水水又最勝太公嘗選地百畝菟裘其前而後

則樊籩水種魚玄祐請甃石圍之太公笑曰土狹則
水寬相去幾何久之手種柳皆婀娜縱橫竹箭秀擢
芟茅蒲戟與清霜白露相采采大有秋思玄祐乃始
築梅花墅竇竇而西輦石爲島峰巒宕岫攢立水中
過杞菊齋盤磴上躋映閣君家許玉斧邁小字映也
磴腋分道水唇露數石骨如沉如浮如續如斷躡足
蹇渡深不及踝淺可漸裳而浣香洞門見烏舍呀窄
窈窕窺暗疏明水風射人有霜電虬龍潛伏之氣時飄
花板冉冉從石隙流出衣裾皆天香矣洞窮宛轉得
石梁梁跨小池又穿小酉洞洞枕招爽亭想坐久之

徑漸夷湖光漸劈苔石累累嚙波吞浪曰錦萍灘指
顧陽水外脩廊曲折宛然紫幌素虹渴而下飲逶迤
北行有亭三角曰在澗所謂秋飲半簾月春餘一面
花是也由在澗綠溪而登濃陰密篠蕊蕓模糊中巧
嵌轉翠亭下亭投映閣下東達雙扉向陽水望見脩廊
曲折方自此始余榜曰流影廊窈窕朱欄步步多異
趣碧落亭踞廊面西山烟樹撲墮橫尾几上子瞻
與元章欲結楊許碧空之遊楊為楊義許為許邁亭
義取此碧落亭南曲數十武雪一龕以祀維摩居士
由維摩菴又四五十武有渡月梁梁有亭亭亭可候

月空明欲艷穀紋輪將若數百斛碎珠流走冰壺水
晶盤飛躍不定渡梁入得閑堂閑爽弘敞檻外石臺
廣可一畝餘虛白不受纖塵清涼不受暑氣每有四
方名勝客來集此堂歌舞進觴詠間作酒香墨綵
淋漓跌宕紅綃于錦瑟之傍鼓五撾鷄三呼主不聽
客出客亦不忍拂袖歸也堂之西出結竟觀居前楹
奉天竺古先生脩觀臨水浮紅渡渡此樓閣以藏秘
書更入為鶴蘂蝶寢游客不得迹矣得閑堂之東流
小亭偕其側曰滌硯亭亭逶迤而東則湛菴閣摩于
羣木之表下瞰蓮沼沼匝長堤而垂楊脩竹菱蒲菱

芙蓉之屬至此益紛披輻湊堤之東南陰森處小
得團蕉鷓鴣鳬鷺若作寓公于此中旅坐不肯去此
中桃霞蓮露續繡綺錯而一片澄泓蕭瑟之景獨此
寫出江南秋故曰滴秋菴昔王太史遊香山欲與二
三子作妄想若斬荻蘆陂渥畫田荷花使十五小兒
錦衣畫舸唱采蓮詞出沒于青蘋碧浪之間可以終
老今玄祐不妄想而坐得之且登閣四眺遠望吳門
水如練山如黛風帆如飛鳥市聲簇簇如蜂屯蟻聚
而主人安然不出里門部署山水朝孫暮竹有侍兒
歌吹鼓左弦右誦有諸子讀書鼓飲一杯拈一詩舞

一棹沿洄而巡之上留雲借月之章批弦月友花之
券袍笏以拜石丈絃索以謝花神此有子之白樂天
無譎貶之李賀皇而不寫生猶不立粉本之郭恕先
趙伯駒之畵畫也秘書未老圃日涉石日黥魚鳥日
聚花木日爛熳篇章詞翰日異而歲不同余且倣角
里先生藤轎弱席筆床茶灶叩君之園而訪焉相與
唱和如皮陸故事玄祐能來杞菊以飽我否

兔柴記

明董其昌

宋人有云士大夫必有退步然後出處之際綽如此
涉世諸公淵識諸也讀白香山池上篇其所謂十畝

之宅五畝之園有水一池有竹千竿有書有酒有歌
有絃者實為衣冠巢許之助溫公之獨樂亭成謝傳
之同憂有以哉今觀濟美張黃門公免柴記其既泉
斲石徑始戊戌去解褐纔七年耳已抗枕漱之思及
在掖垣領衆正稱耆宿雖業在匡時而尋盟之猿鶴
手植之松桂未嘗一日釋於懷及是以請急歸而喜
可知也嗟呼輦下貴人嬰情好爵驟鐸馬通之外別
無活計即回首家山不乏平泉金谷亦僅付園丁莞
鐫作者遊者賓主誰分求其如白傅之飲一盃吟一
篇於池上者少矣況能左伊川右康節著書談道煨

山川之色而隱起華夷之望如溫國者哉是在兔柴主人矣余林居二紀不能買山乞湖幸有草堂輞川諸粉本著置几案日多遊於枕烟艇滌煩礪竹里館茱萸泥中蓋公之園可畫而余家之畫可園大忘人世之家具略相埒矣獨世方急爲余能使世兼忘我是爲異耳

遊武功山記

明 劉陽

嘉靖己亥秋余謀武功之遊或謂宜浮輕舟乃九月丁酉發棹霽景宜人溯數十里林木蔚然一登樂度山寺又數十里爲紫石潭兩崖青山宛有越中風致

日曛泊徐溪石境境處見殘霞映樹新月眉生矣戊
戌移數里灘鳴漸急索杖履舍舟而去亭午憩龍雲
出望梅溪諸峰奇絕留人暮宿山庄未黍豐年再誦
延秋之句已亥山中人導行路多險巇或微諷曰一
失脚時千古笑聽者瞿然沿溪而折過月家山盤石
碧潭潺湲可弄隔岸花竹蒙茸聞鷄犬聲戀戀不喜
去暝至山口宿竹林深處夜中聽流泉不寐庚子日
初紅即往可五里曰南平衆山迴合平時一區茅屋
三兩家相呼可聞溪中石蘧度以板橋扣草扉一老
人出衣短布犢鼻褌自言獨栖者五十年且曰吾不

鮮多言但在此耳蓋自指渠胸中云自是石路登登
斗折而升出沒雲蘿出芳襲人忽鍾磬出白雲間指
圖坪殿角笑道人迓迎仙橋菴前二杏樹大可蔽牛
樹下敗礎殘鍾字漫滅不辨遂徑入山閣曰無塵樓
宿焉老者夜携杖出葛仙公傳於燈下盡讀之其丹
成自頌有云流珠流珠役我形軀奔馳四海厯覽羣
書披尋不悞惟思如愚直人度人要大丈夫乃至此
三復焉曰嗟乎維以二氏之雄亦豈不曰惟大丈夫
能耳

遊百泉記

明張縉彥

余壬午七月越今年三月遊百泉者七秋行則空濤
吞石冬詣則雪頗歷天晨行則氣涌平曠晚入則人
衝暝雨終以城闌隔不獲信宿其上四月九日集郭
公望蘓門山房時貢院初緝百工雜作於水竹間執
事者飄蓋如雲余引盃酌以避之徘徊浩渺既而夕
陽漸下人跡訖滅二三友人乃牽舟石檻之下折竹
竿而蕩之水清舟平儼然入泉之腹矣榜人爲我言
直北古楸樹下碧泓深不可測日影射之見金鯉出
沒長丈餘焉余挽舟趨之石底暗杳光閃源開如玻
璃色舟子竹尾所指水珠隨之迸出然不見忽忽然

水草披動則以為大魚過也余亦悚然泊湧金亭下
溪邊蘓長公題字適然骨氣浸淫余衫袂間上觀水
廟謁先師祀像仍登舟則一月橫霽矣暮色深烟一
川盡綠舟中望之不知是月是水滅燭逾時迄不能
辨也歌者唱未辭之詞景中人恍惚遇之此泉竟不
與未辭并賦水山之遇亦有幸不幸也因與客舉酒
慰泉相顧樂甚江山人千頃鳴棹而歌余屬而和其
詞曰寒烟飄月動夜樹籠天寂獨有閑吟人迷離一
片碧歌訖從舟所如西山之缺有聲簌簌而起潮聲
往聽顛倒錯亂忽而罷寂不知為何聲也按流溯柳

水聲又激下洗心亭舍舟策馬醉眼欲舒白鷺洲前
攀石橋歷危磴密樹稠蓼有遊人踞烟雨磯上火滅
茗寒盃榼在焉時漏下三鼓乃踏月六七里而憇

冷泉亭畫記

明程嘉燾
孟陽

魯生以此扇索畫畱余途中年餘矣今年再同至杭
長夏魯生泊松毛而余輟輟光時往來焉又時時致
美酒酒酣輒與坐客揮洒一日魯生所餉酒特芳冽
適雨過下至冷泉亭觀瀑徑靈隱寺僧舍携友人數
輩先置此扇於案汲水拭硯及移茶鑪酒榼就涧底
弄石掬水磅薄大醉徑起入寺因惜魯生不共此作

畜貽之其兀然歌坐余也對余飲者為薛惠光相向
斟酌者為薛更生張德新翹足仰卧者馬翼甫熱爐
煎茶為範谿父濯足仰觀岩際僧者陳文叔也時烟
嵐淋漓雲水杳靄雖未及彷彿而人物意態筆法流
動衆客頗絕倒遂命記之

重修冷泉亭疏

明 沈守正

憶為童子時足下不越鄉校讀白香山冷泉亭記至
山樹為幄岩石為屏雲從棟生水與階平毛骨俱飛
歎何日得遊息其下安知功名富貴哉更數年偶得
出遊恍如風夢流連不忍別去今冷泉為吾日用之

物如匕間蔬肉手間筆札雖不厭之亦忘之矣殊不見有所困發而老鈍日甚于童子時甚矣余之負冷泉也雖然香山嘗東林唐父云肯與冷泉作主一百日勝于二十四考書中書彼高賢以日計之不得者余以歲計之而過此未之或知也余于冷泉似亦有往因乎亭之初制高不倍尋廣不累丈今三倍之宋僧樂然所改作也或者以復古為奇余謂不然唐時五亭錯出于山椒木抄之間制不宜大大則失點綴之情今四亭俱廢冷亭櫺攬其勝小則不足以收烟月納涼燠亭仍今制是也亭重新于萬曆戊己之間

今復將圯敗棟頽垣風景為殺余雖有名斯亭而氣
爽不敢登水清不敢軟者亦年餘矣微獨余不能有
亭游者亦不能有亭將靈鷲亦不能有斯亭余之負
冷泉也寔甚于是與性證謀新之度冰百五十金不
可證曰此亦功德事也余曰勿言功德山川臺榭自
古高流勝人領之修缺舉廢改我葦事也必功德而
始布金則一僂婆夷矣

湖上書詒黃山人

明田汝成

叔未
錢塘人

一日余過蘓州黃勉之省曾風流儒雅卓越罕群嘉
靖十七年當試春官適予過吳門與談西湖之勝也

便輟裝不果止上來遊西湖盤桓累月勉之自謫五
嶽山人其自稱于人亦曰山人予嘗戲之曰子誠山
人也癖耽山水不顧功名可謂山興瘦骨輕軀乘危
陟險不煩筇策上下如飛可謂山足日擊清輝便覺
醉飽飯後一溢飲可曠旬可謂山腹談說形勝竄狀
奧妙舍腴咀馬歌詠隨之若易牙調味口欲流涎可
謂山舌解意蒼頭追隨不倦搜奇剔隱以報主人可
謂山僕備此五者而謂之山人不亦宜乎坐客為之
大笑此雖戲言然人于五者無一庶幾焉而漫曰遊
山必非賞鑑者也

顏公山記遊

歲癸丑八月余自浙回不耐家居冬十月二十有一日徑同小子啓幹程生五一入顏公山中游矣去吾家二十五里至山麓山麓而上十五里為菴菴址潤可五畝方布山下四山在上環而圍之若城郭然登山後猶然不見梵宇何在祝先生無功令休時顏其堂曰白雲深處鄉先生范晞陽表其沙門之首曰顏公山是山也喜之者目為蓬萊仙島苦之者薄為僻塢窮崖余攜簞躡筇而來居此甚適也山中六月後始有園中蔬可摘余來正當其期菜蔬大熟採其葉

為薤間佐以芥芋或時和脫粟烹之可稱盛饌六月
前菜不能常得竟終日素飯相餉而已衆或共苦為
窮僻者此也予謂攻書食淡自是山人本色所不佳
者霧氣較重露滴竹簌有聲初不知以為雨下開戶
視之乃霧也聞之春霧尤甚窓不辨字庭不見人居
者鬚鬢常濕非木屨不舉寸步至謂冬寒不宜起居
則屬臆說蓋夏氣清涼蚊蚋不到友人多有在山過
夏者溺其涼遂遙度冬寒必甚不知夏涼而冬實溫
惟是朔風飄發冰雪不開則栗烈難近非是日也煦
燠襲人勝于家居菴有池相傳半清半濁清曰聖

池濁曰龍池顏公嘗泰龍於此予探其跡一池也中
累以石諦視之未甚別清濁問之舊住持者養元養
元指數不詳後吳生尚之以顏公山事實來予復質
之老僧淨臺淨臺曰嗟昔青龍有巨石巨門中空如
視石視通水直溜池中時則清濁分明自形家鑿去
此石池水淆者于今三十年矣先是池中水歲涌出
洗殿今亦不復覩矣予聞而太息者久之有佛一座
崇不盈尺土人呼為金佛顏公耕山時得也鄉先生
程練水虔事之另為治像于外設重座座金身加封
鎖焉要之護持失守佛身業已非故久矣菴外黃山

對峙白嶽坐左伏九華斜拈越菴五里至小巔復越
三十里至大巔予若不能登高每天空日霽時僅僅
散步菴外遙望遠山接天淡雲微現層巒疊翠縹緲
似畫齋間或時霧罩下山烟波萬頃山頭丰霑近者
如小舟在浪遠者如海門三山不啻百數人言登大
巔可望三湖又謂可望鄱湖不知長江大海日已生
我足下豈必絕頂乃愉快哉雲物時來相親可把而
握嘗有極之以贈人者山居月餘足未履霜曾三閱
雪雪景最佳非雪景佳也雪而冰故佳也疇昔之夜
大雪予對燈孤坐時聞折竹聲早起山骨竟成水晶

竹玉葉樹瓊枝對面觀之如巨人穿皜甲持戟俯躬
相向古云草木皆兵暗此信非欺我薪梗藤蘿屈曲
勁特如蒼虬蛛網變為素絲戶牖庭除積坐未掃如
綴珠旒又似皓鬚老者其於地也為剛鹵竒觀竒
觀哉山產藥材更多葛山民來取葛者宿於菴寒無
被程生五一時以禪衣結之菴畜有犬無鷄夜來羣
鴉棲竹天將曉代鷄司晨自冰雪後鴉去矣於是鵲
來鵲時噪我牖下或入庭中求食見人稍稍引去不
甚遊僧徒十餘輩人遊太古蓋幾乎無懷氏之民早
曉切課貝葉聲遙聽之每令予魂銷卑境謂此中為蓬

萊仙島者近是顏公姓李休坪坪人至今子孫猶歲一登山追薦云

橫山草堂記

明江元祚 邦玉

客詰橫山樵子曰達人安于容膝子居室之外有澹圃竹樹池臺亦多侈矣又况結境幽奧城市之中儼然丘壑能閉門即深山也何乙卯迄癸亥不逾十載又營草堂得無取境過奢乎山樵曰噫余豈貪于取境者哉蓋欲以可進可退之身寄之山林城市者也故兩營焉以為藏身地耳客曰子言是矣第草堂奚加于澹圃每見子過澹圃如寄入草堂如歸何哉山

樵曰澹圃之不得正草堂猶培塿之不可當衡華也
請為子言之草堂結于黃山黃山舊名橫山土音呼
橫為黃遂相傳為黃山云維吾家五十里許其道有
二一繇湧金門以平湖長江為徑厯淨慈而梵村入
朱橋一繇錢塘門以古梅脩竹為徑厯東岳而西溪
越大嶺二徑俱勝一蕭曠一幽邃入山宜幽予多取
道西溪焉西溪抵吾菴路過半矣延途茂林森夾碧
澗紆流村落茅亭不數里一憇且轉折烟迷如入武
夷九曲非止行山陰道令人應接不暇也近菴二百
餘武更有六松大數十圍高可百尺古幹龍拖蒼姿

翠滴每箕踞其下清冷之氣逼人。不惟為橫山翹楚
即三竺九里亦遜下風。惜局于社壇之間。殊未得所
耳。然峭峙路傍。與佛慧古樹法華老梅均為吾往來
快觀。若千百年来預為山居闢此佳徑也。繇是漸入
深壑。竹陰轉密。日影不得漏落。有溪一灣。溪浚橫瀉
雪浪漱石。齒間予磊石為橋。即名漱雪。更植桃其坑
取桃花流水杳然去。別有天地。非人間意。傍有一泉
在清澄可弄中。涵竹色。因以蓄翠題焉。過此則白雲
蒼靄斜封小徑。而一種幽深之致。能令人意自遠。再
歷高阜。松筠夾道。逶迤而入。編竹為扉。曰鹿藩藩內。

復開曠地植梅數十本冬月香雪平鋪亦不減孤山
疎影此處一望翠竹成窩青山作障蔥多林木掩映
茅簷而籬垣一帶橫亘山腰如作閑棚于戲謂友曰
向使靈宙山早亦如是未必飛來為吾西湖作勝地
也因顏其門曰扁岫進此有堂高出竹杪風枝掃月
如奔綠浪遂名竹浪居從此左支五折而進淨供梵
王則名室蘊菴前梨樹一株疎秀入畫及夫花發春雨
微濛嬌香冷艷渾如美女初浴蕭灑風前也左曰香
夢窩予寢榻在焉右曰掛履寮以款吟侶稍後曰雲
髻軒峰露牆頭如人行于牆外而見其髻然庭北有

閣二松翠翳日雲壑挂面署曰巢松曰雲肆閣之南
又有軒結境虛敞桐陰薜石點綴堦前竹露松風時
送秋響更枕小澗旦夕沸聲非特眼累間遠抑且耳
際多韻偶舉陶句曰悠然見南山取其面山而悠云
耳稍下數級臨所枕澗因堪浴硯即以名溪溪上加
一艇曰留霖令得憑欄醉目觀星浪碎飛或汲流煮
茗坐而談玄故來遊者不致徒涉而過越足地多奇
石余稍為布置可依可憑曰泚筆壘就其高下屈曲
嵌一修廊宜吟宜步曰却月廊盡另闢一竇臨山臨
流曰花淙雲構內有敞閣三楹山翠環擁大爽人意

當雨雪之晨霞月之夕挹嵐光之變幻觀浮雲之卷舒能令骨痴心醉李九超先生題曰醉山深得此中之趣者也下有曲室曰偕隱謀蓄妻子處再進有半閣曰藏山舫取式類舟兩崖相夾如泊富春山下境之最幽絕者出樓南曲徑陰深蜿蜒而上搆一亭曰霞外參差峰宙浪擁眉際寥廓江海鏡鋪目端如之朱氣煨衣白雲握足予每登眺便覺體氣欲仙惟圭皎皎霞外之句余向喜其立論超曠而今竟得其實際矣他如菴後有玉峽水豹躍泉足供瓢飲何莫非山樵清享山後又有白龍潭千尺巖可暢遊覽何

莫非山樵樂地乃知草堂之構既屏以崇山峻嶺復
遠以茂林脩竹前則江湖梅松為徑後則岩石泉瀑
為隣誠為造物所鍾玉厚以天福而後樂此予薄福
人願依棲焉敢自欺耶第論人生斯世上者樹立勲
名卑者窮極穀色最下為守錢虜究竟不過為此營
律一生今吾寂居草堂于聲也以松風泉韻代于色
也以山光竹秀代于名也則山人樵子是吾名于利
也則無事無憂是吾利人世之馳逐吾既有以易之
而又取之無不足則安得入草堂不如歸哉至于功
成身隱吾未嘗有子房之勲業潔身遁世吾未能如

子陵之高尚可進可退吾俟吾命以山為家吾之性也惟性相近吾將老焉子言過瀘圃如寄子真知我者夫


浣花谿記

出城都南門左為萬里橋西折纖秀長曲所見如連環如珎如帶如規如鉤色如鯁如琅玕如綠沈石竊然深碧滌迴城下者皆浣花溪委也然必至草堂而後浣花有專名則以少陵浣花居在焉耳行三四里為青羊宮溪時遠時近竹柏蒼然陽皖陰森者盡谿平望如薺水木清華神膚洞達自宮以西流匯而橋

者三相距各不半里舁夫云通灌縣或所云江從灌
口來是也人家住溪左則溪蔽不時見稍斷則復見
谿如是者數處縛棘編竹頗有次第橋盡一亭樹道
左署曰綠江路過此則武侯祠祠前跨溪為板橋一
覆以水檻乃覩浣花溪題榜過橋一小洲橫斜挿水
間如梭谿周之非舟不通置亭其上題曰百花潭水
由此亭還度橋過梵安寺始為杜工部祠像頗清古
不必求肖想當 甫石刻像一附以本傳何二仲別
駕署華陽時所為也碑皆不堪讀鍾子曰杜老二居
浣花清遠東屯陰奧各不相襲嚴公不死浣花可老

患難之于友朋大矣哉然天遣此翁增夔門一段奇
耳窮愁奔走猶能擇勝脰中暇整可以應世如孔子
微服主司城貞子時也時萬曆辛亥十月十七日出
城欲雨頃之霽使客遊者多由監司郡邑招飲冠蓋
稠濁聲折喧溢薄暮趣歸是日清晨偶然獨往楚人

鍾惺記



題文趣後

妙寂山翠微寺之成已久矣而余未嘗一宿其中然
或問花或尋瀑或看霜葉每一日往返而止已丑十
一月十八日與吉甫襆被而來遂携文趣二卷即漢
魏以下至明人所作佛廬僧舍山居野處溪林邃宇
徃徃有趣語之文莫不畢備於此農巖先生嘗手抄
目錄屬雲瞻出為卷曰將待此寺之成築書室玉簾
泉傍徃來留止相對諷誦以為山中一段奇事也嗚
呼先生今已去世則於几案間或見此書未嘗不掩
卷流涕矣既而思之若使此書棄為篋笥中物無以

見後世先生之意一與同志之人屬此鴈門之跡亦
可為幸而困於世故曾未作一閒行矣今者吉甫相
與期於茲為詩酒會時白雪滿山僧院無客佛火青
熒木魚徐響夜深月出羣物寂然輒開卷一讀欣然
得山水之樂而益不覺感發於心遂以文志之門生
平昌李澐書于處一上人房







